

桂洲奏議

十六七

漢	書	門	類	號	函	架
八	九	一	二	三	四	五

內	閣	文	庫
漢	書	類	號
八	九	一	二
冊	冊	冊	冊
架	架	架	架

內閣文庫	
番號	漢 8912
冊數	10( 8 )
函號	287 39



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



桂洲奏議第十六卷

南宮集卷之七目錄

簡選嬪御疏

南京太廟勅議疏

刊布勅議以昭令典疏


遵明旨陳時政備採擇以禪修省疏

欽奉聖諭疏

請定禮義中正垂式臣工遵守疏

恭建宗廟疏

宦官詐傳令旨乞行究治以除姦亂疏



桂洲奏議

目錄

卷之七

奉議七廟名額疏

查明侍班禮儀疏

明職掌以嚴銓選疏

南京太廟疏

以上十三年十二月以前稿

桂洲夏文愍公奏議第十六卷

事

門人

涇縣左 鎰

編輯

宣城貢汝成

校正

華亭徐 階

階

武進薛應旂

之瑞

裔孫

之琳

重訂其

灑

全校字

南宮集卷之七

禮部題

簡選嬪御疏

儀制清吏司案呈奉本部送禮科抄出錦衣衛親軍指  
揮使司衣左千戶所旌節司見任署百戶費洪奏遵奉  
皇明祖訓今後大小官員并百工技藝之人應有可言

之事許直言至御前聞奏其言當理即付所司施行欽此欽遵嘉靖十三年正月二十四日臣具前情奏奉旨禮部知道比時本部不敢輕易復奏今日皇上聖體康寧萬壽天齊皇嗣東宮不可不先預建雖然有賢后妃嬪在位先後已經十三年矣皇嗣之兆雖見未久光陰易過不覺漸遠聖母在上默想皇孫願天早降聖心切矣先年輔相建立九嬪後蒙皇上擇轉三嬪冊封后妃見有三缺應該選補臣時常靜慮皇嗣生母非比尋常必得根源貴重相貌非凡者則可皇上尊爲天子富有四海建立皇嗣大禮當行若以拘執繁瑣未免耽延歲月

臣愚淺見惟願皇上勅下禮部曉諭京城內外大小人家平昔良善父母端正務要女子德性溫良語音清秀端莊豐偉貌相非凡者以百名爲則聽其親父前赴禮部報名不許隱情一槩混報仍候諸王館選擇上等十名引赴皇宮門外恭候聖母點擇三名補完九嬪不與者送出如此天意必成祖宗必祐來年秋冬次年春夏皇嗣誕降自然而來上可解聖母默想皇孫之願下可使天下臣民懽忻鼓舞之樂臣本爲朝廷舉興皇嗣非敢妄求臣冒犯天顏不勝恐懼等因奉旨這所言禮部看了來說欽此欽遵抄出送司查得嘉靖九年十月

內該大學士張孚敬奏奉旨覽卿所奏朕具悉忠愛誠切至意朕大婚將十年元配又失嗣承久虛深用憂懼每上厘聖母之念宜即施行禮部便將應行事宜作速議奏來看欽此該本部議得合候命下本部差官二員先齋榜諭北京直隸南京鳳陽淮安徐州河南山東等處所在官司於大小官員民庶之家選求報名在官仍乞欽命選差司禮監公正內臣二員齋勅分投前去再行訪選堪中者有司以禮令其父母親送馳驛前來其在京五城報到者先行送赴諸王館選擇等因具題奉旨這所奏都依擬行內官不必差你部裏還差官四員

分投齋榜前往各該地方慎選仍嚴加曉諭勿得因而騷擾百姓以稱朕爲宗祀至意欽此欽遵隨該本部題稱京城內外本部堂上官督令該司官會同巡城御史一面先行選擇陸續送諸王館請命司禮監官引送聖母御前選擇等因節奉旨所奏事宜都准依行欽此續該本部侍郎嚴嵩收報到民間女子一千二百五十八人緣止據地方呈報未免人品混雜遽難引進宮闈合先行欽天監擇日送諸王館選擇查得舊例係命司禮監官出府選擇非本部外臣與知正以內臣不嫌於供事而閱察得致其精詳也合無仍勅司禮監官惟復俯

從往年給事中汪應軫所議欽命皇親夫人二三人選擇等因題奉旨這女子并續到的你部裏送赴館着內夫人女官選過引詣聖母前擇用著爲令欽此欽遵外今該前因案呈到部看得錦衣衛署百戶費洪奏稱先年立建九嬪後蒙皇上擇轉三嬪冊封后妃見有三缺應該選補乞要曉諭京城內大小人家平昔良善父母端正女子溫良者百名爲則聽其親父前赴禮部報名候諸王館選擇上等十名引起皇宮門外恭候聖母點擇三名補完九嬪一節查得本官先次於本年正月具奏與今所奏事理相同比因冊立后妃大禮初成本部

未敢議覆今臣等看得本官先後具奏前因足見草茅之臣有懷忠愛之意且九嬪既有虛位相應選立但採訪貴博選取貴精本官具奏限以百名似乎太隘合候命下本部榜諭京城地方及委本部堂官一員屬官二員會同五城御史督同各城兵馬司於在京大小官員士民善良之家用心選求務擇其父母行止端莊家法整肅女子年十四以上十七以下容貌端潔性資純懿言動溫恭咸中禮度者不限名數各開報年甲生時到官本部行令欽天監擇日請命夫人女官於諸王館選擇性資貞淑容貌出衆者十餘名引赴聖母前簡選以

補立九嬪惟復止照本官具奏聽其親父前赴禮部報名臣等未敢擅擬伏俟聖裁

嘉靖十三年八月十二日具題

南京太廟勅議疏

本月十三日欽奉勅議南京太廟復建或弗建朕惟太宗既遷北京爲子孫萬世之業則南京太廟不必重有或謂太祖初定之都且爲子孫者當萬世以慕功德不可廢也朕則以爲必欲建廟以報功德必又當捨北京之太宗所立之廟矧夫太宗既已定北都傳已六宗矣能爲太祖太宗守洪業萬世其傳無南北之分我太宗所定之基我太祖亦未爲不格于斯一天下作二主二廟恐弗合禮與義或謂承天府尚有獻考廟是非薄祖厚親歟朕則曰承天之曰廟者昔藩邸之所存者奉孝

宗命建府第時作者不敢去之况此即南京奉先殿之義可比非是茲世廟同朕惟周家雖有三都三廟之同建彼今不同今之南京者祇存百官有司不巡幸不舉時祀徒有廟社或曰累朝舊典遇事則遣告焉朕惟祖宗唯於子孫是依是憑有疾一代尙若弗祭况數千里之遠能將我之誠敬者今既以北京立萬世之業則當爲萬世之圖使其定專于此庶幾太祖永歆不必以作廟爲歆也勅爾諸臣議欽此欽遵查得先該南京禮部尙書湛若水等題前事內開近者南京太廟被火伏聞於內列祖神主一時亦被延燬號籲莫及竊謂列祖神

靈陟降在天皇上親承宗廟之祀對越歆享仁孝誠敬爲已至矣南京既有太廟又有奉先殿每日及朔望進膳列祖神靈固有所依但南京太廟神主係是祖宗百七十年奉安已久一旦遭此災變恐無以慰皇上孝思瞻切之情臣等待罪禮官仰體聖孝必須補造列聖神主以爲神靈之依必須重建南京太廟以爲奉安之所然又工程非歲時可就香火非日月可缺似此數端臣等實竊究心未知所宜伏乞聖明勅下禮部議處奏請或先欽製告文特遣大臣前到南京祭告列祖神靈或權將南京太廟原日朝夕香火暫併于南京奉先殿用



少伸皇上純孝之誠惟復別有裁處等因奉旨禮部看了來說欽此欽遵臣等會同大學士張孚敬李時武定侯郭勛吏部尙書汪鋹等議得唯天子議禮唯聖人達孝近日南京太廟既燬于火該南京禮臣奏請欲將南京太廟原日朝夕香火暫并于南京奉先殿其重建廟制補造神主干係宗廟大禮取自上裁欽蒙勅下該部看詳臣下雖欲據經守禮愚賤未敢專擅欽蒙皇上頒勅下議臣等伏讀仰思備見皇上至德達孝綸言精確貽謀高遠不獨有以正一代宗廟之禮且足以定萬世帝王之業誠非臣下所及乃復不自滿假務集衆思尤

見虛中愛禮甚盛心也臣等凡愚何能仰贊萬一然有君如此安敢不盡竊惟古者國無二廟廟無二主故虞祭用桑主練祭用栗主栗主既立乃毀桑主君去其國則太宰取羣廟之主以從明天無二日尊無二上國無二廟神無二主也後世此義不明漢有原廟齊有僞主襄瀆誣妄事神則難乃若有周三都三廟則又禮以義起事有攸宜岐周則太王諸侯之廟鎬京則武王定都所建洛邑則周公定鼎所建然鎬京廟成則岐周之主已從洛邑雖廟成王未嘗都洛則鎬京之主自在周公雖以至親留後然諸侯不得祭天子支子不得祭太宗

文王武王之禋蓋非正祭故國有二廟自漢惠始也神有二主自齊桓始也周之三都三廟乃遷國立廟去國載主非二廟二主也我太祖肇都南京即周公都洛太宗定都北京即武王都鎬知武王周公之志未嘗不同則知太祖太宗之心未始異矣况太祖末年嘗有改都之議則知一時定鼎金陵未稱貽謀之遠迨太宗定都燕京內制六合外控諸邊形勢遠過關中固萬世帝王之業我太祖在天之靈豈不居歆况聖子神孫既親奉祀事于此則祖宗神靈自當陟降于此斯固人情亦乃神道古人立主依神立廟依主而子孫之身又祖宗所

依今日正當定專于此使宗廟社稷專主于此本支百世根本于此祈天永命保民出治罔不于此茲實億萬載無疆之休此臣等所謂不徒定一代宗廟之禮而且以定萬世帝王之業者也臣等雖愚且賤心知其是確乎不可易矣然仰惟聖衷謙虛猶若有所未安者臣等請得而贊之唯聖明斷焉今日南京太廟之議大略有二或謂可弗建者以國無二廟神無二主也或謂當重建者以南京根本重地祖廟神靈久依有其舉之莫敢廢也弗建也者守禮也重建也者以義起也雖見有不

專也弗敢遂也今伏讀聖諭所謂既以北京立萬世之業當爲萬世之圖使其定專于此庶幾太祖永歆必不以作廟爲歆云者則弗建之議可以的然而決矣聖諭所謂南京祇存百官有司不巡幸不舉時祀祖宗唯子孫是依是憑云者則復建之議可以渙然而釋矣此所謂衆言淆亂折諸聖也至曰太宗定北都傳已六宗能爲太祖太宗守洪業無南北之分又曰一天下作二主二廟恐弗合禮與義大哉王言一哉王心聖學孝道茂以加矣雖聖人復起不能易矣乃知睿思淵識自出尋常萬萬倍也至謂承天府尙有獻考廟今弗重建南京

太廟爲豐祀于昵此以小人之腹度君子之心百姓不知者耳况事體大異比擬不倫聖諭固已折之當矣且南京太廟今日之廢非出于人而祖宗廟享固在于此匪曰疏之實以親之匪曰薄之實以尊之以善繼善述之心爲不愆不忘之孝守文祖遷都之慮保高皇創業之謨則不當復建廟于南京者誠萬世不易之定論也况南京皇城宮殿傾圮者多累朝以來不許修飾而近日議臣往往奏欲修理此皆不知祖宗深意殊非所以守成法而定民志也且北京宗廟行將復古定制久注淵衷而南京太廟修飾方新遽罹回祿則皇天眷德之

意聖祖啓後之靈恐不可不默會於昭昭之表者也臣等學不足以洞達天人才不足以彌綸治道然仰奉聖謨僉謂茲事可以質鬼神而無疑俟百世而不惑矣但南京原有奉先殿在其朝夕香火自當併合供奉如常仍乞俯從禮官祈請欽製祝文遣官祭告其太廟遺址似當倣古壇墀遺意仍高築垣墻謹司啓閉不致有所踐踏以致尊嚴之意則禮成義盡而國是定矣宗社幸甚萬世幸甚

嘉靖十三年八月十五日具題十六日奉旨卿等既會議停當南京奉先殿香火併日進膳儀禮部查議

了來看原廟址依擬高築圍垣以護所司時加巡守併各處以後勿得整修著著爲令在京廟制即便着各該司先行擬辦物料來歲作急擇日興工承天府皇考家廟亦勿稱廟即倣奉先殿意曰隆慶亦即制扁奉安用別重輕之意遣官祭告亦無謂待查明香火進膳一併區處各該衙門知道

刊布勅議以昭令典疏

祠祭清吏司案呈嘉靖十三年八月十三日該本部尙書夏言蒙召赴平臺欽授勅議南京太廟事理該本部會同內閣府部等衙門集議上聞本月十六日已奉聖旨通行各該衙門欽遵施行外今該前因案呈到部臣等竊惟南京太廟事宜斷自聖衷允協輿論克應祀典足昭王章臣等所謂正一代宗廟之禮定萬世帝王之業質諸鬼神而無疑以俟百聖而不惑者也是宜著爲令典垂世大訓必須刊刻播傳庶幾家喻戶曉使凡我臣民建極歸極是彝是訓知唯天子議禮聖人達孝而

天下寡過矣臣等謹將欽奉勅議并會議題奏繕寫裝  
潢成帙隨本進呈御覽伏乞欽定書名勅下本部刊布  
以垂久遠

嘉靖十三年八月二十二日具題二十五日奉旨依  
擬名做勅議刊傳

遵明旨陳時政備採擇以裨修省疏

祠祭清吏司案呈奉本部送禮科抄出巡按直隸監察  
御史鄭坤等題本年六月十三日南京太廟火災禮部  
一本題前事除祭告修省外內開仍望陛下體上天仁  
愛之心盡修省消弭之實遵照祖宗以來舊規下寬大  
之詔求忠讜之言令兩京六科十三道極陳時政得失  
條列以聞其大小臣工有姦欺貪墨形跡纍著者指名  
糾奏尤望陛下垂察納之聽寬狂易之誅擇其可者而  
必行之其不可者亦容之則衆言進而幽隱達人事正  
于下天變消于上矣等因奉旨是祭告事宜朕已有處

寬恤詔書去歲已大布了罷各衙門有事關修省應行的各條陳來看其餘依擬欽遵外臣有以仰見陛下遇災而懼自可昭格臣惟南京太廟百餘十年雖所以安祖宗在天之靈而未嘗一日不切于陛下奉先之心蓋精神自相流通而休戚不容少間陛下自聞變以來祭告戒諭無所不用其極大小臣工兢業檢點凜然莫知所措皆以陛下大統御極勵精求治敬天勤民法祖孝親修身以道遠接羲農之統修道以仁不替堯舜之心凡禮樂刑政紀綱法度無不至精至當放之四海而垂之萬世矣而天心仁愛交作雷火臣謹按周易震爲雷

其象曰君子以恐懼修省離爲火其象曰大人繼明照于四方然聖經備載其理昭著固非若漢儒泥於既福休咎之穿鑿諸家滯于小說讖緯之剋應惟陛下居則觀其象而玩其辭動則觀其變而玩其占自能轉旤爲福變災爲祥恐懼修省即陛下敬一之功而繼明照四方即陛下緝熙之學固皆優爲臣猶拳拳言之者欲陛下益動而弇日進無疆庶妖不勝德而人定勝天矣但臣愚者一得條陳八事臣聞天道甚遠人道甚邇故人君修政以博問自能轉災以爲祥因擬備政寰宇精英民物標準固嘗立心立命不可愈遠愈湮因擬崇祀天

造草昧國步艱難其先人會以身殉國不可使其後不錄因擬典滅物之終始不外乎誠但習俗日靡則民僞日滋因擬尚實民爲邦本本固邦寧凡茲有生之衆皆係祖宗赤子故擬重本赳赳武夫公侯干城欲令親上死長當先解衣推食故擬仁武崇德紕惡王制所先公是公非仁君所慎欲使閭閻樂利要在慎惡章好因擬嚴考張綱掛雲野無遺翮傾崑取璞山無遺珍欲賢才盡皆效用在君相用意咨詢因作審官以上八事在朝廷行之固久于脩省實有所關若再申明振飭自是鼓舞作新臣久知辱臺不敢愛死狂瞽之言伏望聖明俯

賜採擇勅下該部庶修省盡而災變弭矣等因奉旨該部看了來說欽此欽遵抄出送司案呈到部看得巡按直隸監察御史鄭坤題稱條陳八事除備政興滅重本仁武嚴考審官六事通行各該衙門徑自查處外令臣謹將崇祀務實二事開坐議擬上請伏乞聖明裁定候命下欽遵施行

計開

二曰天地神祇歷代帝王道統師儒陛下精誠純敬設主立廟物無弗備儀無不周堯舜三代之主無以過矣至于仕于其地而有政蹟惠澤及



于民者謂之名宦生于其地而有德業學行傳于世者謂之鄉賢固皆清淑之氣萃之而爲賢俊廊廟之材用之而作霖雨陛下固令有司立有祠宇春秋致祭矣然或徇情去取而賢否或至于倒置叅酌弗公而淑慝或混于無別遂使忠魂義魄尚耻于絳灌同列正氣聰明不并與草木同腐未免物不得平氣乖致異伏望陛下勅下該部即行天下掌印官會同儒學師生各查本處應祀名宦鄉賢俱遵照大明一統志所載逐一從公會議明白備將職位姓名及履歷

行實各相講明務使事有考據衆無私議然後方許入祠見有祠者時加修葺原無祠者即便修蓋以及梵宇瑤宮等項先年奉拆毀淫祠事例已將私剋及不係應祀之神俱已拆毀矣今後仍嚴禁有司不得假以拆毀之例肆爲漁獵之場或利其木石而剋落修理之價或改爲書院而申動帑藏之積名則爲國家毀淫祠實則爲貪官開騙局監司昏闇者在其申請爲所賣而莫之知生徒俊秀者苦其虛拘被其擾而不敢言合行各省巡按通查各屬奉例之後拆毀

者若干改造者若干要見有無剋落官銀徑自  
叅治以後免其拆毀俯順愚民之心庶神不濫  
而人不偷詩云神之聽之既和且平是之謂歟  
故曰崇祀前件臣等議得名宦鄉賢之祀乃國  
家崇德報功盛典比來愛憎任情臧否失據名  
實不副激勸無聞所據御史鄭坤所奏具見敦  
本尙實相應依擬合候命下本部移咨都察院  
轉行各該撫按衙門行令提學官着落府州縣  
掌印正官及儒學師生備查各處名宦鄉賢果  
有遺愛在人鄉評有據未經表彰卽便及時興

立祠祀以勵風化若祠宇傾頽及未經立祠地  
方亦合查結無礙官錢擇地修蓋其或惠政殊  
常遺思不泯出於民心追戴願專立祠宇以申  
崇報者有司官員亦當代與申請聽其建立中  
間如有匪人濫預有干清議者亦要從公釐正  
仍將行過緣由回報本部以憑查考其拆毀淫  
祠事例先經本部題奉欽依遵行已久別無議  
擬但本官所稱有司侵漁之弊難保必無合行  
撫按衙門通行禁約如有尅落科歛等弊據法  
究治則吏治可清而神理不誣矣

四曰我太祖之時氣象朴實人心醇厚當時以法  
度明信令命簡肅財力充裕士馬精強風俗樸  
茂學術醇正議論平易文辭渾厚職業修舉天  
下之事無一而不趨于實及其久也文焉而已  
明信者或至于弛玩簡肅者或至于煩飾克裕  
者或至于匱乏精強者或至于耗憊樸茂者或  
至于偷薄醇正者或至于邪僻平易者或至于  
奇怪渾厚少而多澆漓聲譽廣而怠職事此其  
勢之所必至然文既太盛恐象龍不可療饑伏  
望陛下立法制度昭如日月而信如四時出令

申命迅如雷電而疾于風行士飽而嬉馬騰于  
槽太樸未鑿而奢侈痛革太美未和而醇美傍  
行申明敬一之學崇尚古雅之體洗靡麗之氣  
而嚴怠緩之禁庶誠立而百偽消百官自無不  
正百姓自無不安易曰天下雷行物與无妄是  
之謂矣故曰務實前件臣等議得國初之時人  
心敦實學術醇正文辭渾厚事業光明近年以  
來人心不古學術邪僻故政務乖張而功業不  
逮前輩今御史鄭坤舉以爲言具見崇尚實學  
查得先該本部題爲科舉事內一件變文體以

正士習竊惟國家建學校聯師儒以教養天下之學者既乃設科目較文藝以網羅天下之成材自祖宗以來百六十年于茲造士求才之法可謂盡善極美是以學術日明文運日昌至於成化弘治間科舉之文號稱極盛凡會試及兩京鄉試所刻文字深醇典正蔚然炳然誠所謂治世之文矣近年以來士大夫學爲文章日趨卑陋往往剽剗摹擬左傳國語戰國策等書蹈襲衰世亂世之文爭相崇尚以自矜眩究其歸不過以艱深之詞飾淺近之說用竒僻之字蓋

庸拙之文如古人所謂減字換字之法云耳純正博雅之體優柔昌大之氣蕩然無有蓋自正德末年而此風始熾伏自皇上登極以來聖學格天帝文煥日方且屢發德音黜浮崇雅宜乎文章之盛駸駸乎三代同風乃昨歲天下進呈鄉試程文類皆猥鄙不經氣格卑弱背鑿經旨决裂程式其或刻意以爲高者則浮誕詭詭而不協于中騁詞以爲辨者則支離决裂而不根于理文體大壞比昔尤甚乃知俗學流弊振起爲難有識者蓋深憂之茲聖明在上若不大振

頽風力救斯文之弊則將來道術日微人才日壞欲得真才以輔成治理蓋亦難矣此事關係甚大又臣等以人事君之義莫重于此伏乞聖明採納勅考試官今次會試較士務取醇正典雅明白通暢溫柔敦厚之文凡一切駕虛翼偽鈎棘軋茁之習痛加黜落庶幾士子知所趨向而文體可變而正矣等因具題節奉旨是文運有關國運所係不細近來士子經義詭異艱深大壞文體誠爲害治恁部裏便出榜曉諭今次會試文卷務要醇正典雅明白通暢的方許中

式如有似前鈎棘竒僻痛加黜落甚則令革考官指名具奏處治欽此已經通行欽遵去後今御史鄭坤所奏前因合候命下仍通行各布政司提調官各按察司提學官遵照本部先今具題并欽奉聖旨行令各該有司官刊刻板榜發各府州縣儒學明倫堂懸掛朝夕顧諟以淑士心務使文詞不變以還敦厚之風庶幾他日科目得人以成國家正大光明之業矣仍將刊刻過緣由申報本部以憑查考

嘉靖十三年八月二十三日具題二十五日奉旨准

議

欽奉聖諭疏

本年九月初七日該文書官岳欽齋捧御封及臣私第  
 伏蒙聖諭明日早朝罷卿可偕勛等在工諸臣并內閣  
 禮工二部同詣廟庭視計制用物式以憑預辦料耳其  
 制不必前後殿遠去即前堂五間虎座向後離丈餘就  
 接三間為寢室亦義在矣此朕手式可依行之欽此臣  
 謹欽遵於本月初八日早朝罷偕在工諸臣武定侯郭  
 勛吏部尙書汪鉉工部右侍郎甘為霖錦衣衛指揮陸  
 松陳寅等并內閣大學士張孚敬李時禮部左侍郎黃  
 綰右侍郎黃宗明工部尙書秦金左侍郎林庭楫恭詣

太廟會同內官監太監高忠逐一相度地勢督令官匠人等丈量得門牆內深廣丈尺俱與本部原題相同但原擬各廟規制直抵太廟南牆則東西廟垣又出太廟戟門之前且於神庫神厨俱有妨礙今遵奉聖諭前後殿相接爲寢室不必遠去則地位稍寬欲更縮就并亭之北東爲三昭廟并文祖世室而四西爲三穆廟每廟進深占地一十六丈一尺五寸橫闊一十一丈六尺五寸以東西列廟總門與太廟戟門之旁門相並直北後牆與太廟祧廟相並勢位嚴正而規制全備足以仰承皇上崇構宗廟之盛矣謹欽遵御筆親畫圖式定擬一

廟規制丈尺備細貼說隨本進呈御覽伏乞聖明特賜裁定其規用物式并預辦物料一應事宜俱候命下之日咨行工部徑自奏請定奪以憑先事預辦物料施行  
嘉靖十三年九月初八日題初九日奉旨所畫圖俱是便着預辦物料來春仲月即便興工該部知道

請定禮義中正垂式臣工遵守疏

祠祭清吏司案呈奉本部送禮科抄出吏部左侍郎掌  
詹事府事兼翰林院學士顧鼎臣等奏臣等於本月廿  
三日太常寺典簿廳送到手本孟冬祫享太廟時享世  
廟伏奉旨臣顧鼎臣霍韜捧主欽此竊惟宗廟大禮  
得與駿奔幸莫甚焉臣等豈敢具辭惟舊例尙未講明  
制禮之義未經裁定遂至古人禮意鬱而未章臣下無  
所於式臣等謹陳其略伏候聖斷永垂臣工遵式焉謹  
按律例凡祭祀總麻以上喪皆不與致其潔也再按古  
禮期服諸侯絕大夫降夫古之諸侯今之守令也諸侯



無期服公卿可知也然律例云總麻以上皆不與祭又若通上下言之何也臣等竊詳禮意古者諸侯世國其於族屬有君道焉故絕期服禮也今之臣僚在位則爲公卿釋位則有族屬謂公卿釋位亦無期服非禮也當其居公卿之位也亦猶古之諸侯也尊則統于天子位則列于帝臣乃云猶有期服亦非禮也則凡臣僚五品以上無迴避期服之禮可知也然律例總麻以上皆迴避何也臣等竊詳律意喪疾刑餘皆惡不潔也凡言喪者謂其身涖之者也凡言疾者謂其身有之者也身涖喪事雖同居無服凡涖焉皆穢也况有總麻之戚者乎故

律例服不與祭爲身親涖者言之也然則百官凡聞期功之訃私家爲位致情禮焉當其爲位也有愴感焉迴避吉禮可也隨任同居有期功之感暫輟公事致情禮焉當其輟公事也有愴感焉迴避吉禮亦可也若踰旬月皆無容於避矣何也尊則統于天子位則列爲帝臣擬之古之諸侯不避期服禮也臣等聞大功期服之訃已踰數月矣然而謂古禮爲當遵也則駿奔之役不敢辭若曰常例亦宜式也則服制之期猶未滿欽蒙聖眷復命臣等供事太廟臣等若隨例具辭則上拂聖意且非古禮正中之極矩如不深思禮制講而議之輒爾供

本洲奏言  
忠禮書院  
役彼執律例而不通其義者又將議臣等之爲戾也仰  
惟皇止綱常宗主制禮垂式百王睿見獨高萬古臣等  
應否迴避乞賜裁定俾臣工永有遵式焉臣等不勝惶  
恐俟命之至等因奉旨這所言亦當但不以私妨公可  
也然須分別重輕禮部便看議了來說欽此欽遵抄出  
送司查得大明律內一欵凡祭祀總麻以上喪皆不與  
及查得本部凡遇郊廟一應祭祀其陪祀官員除年老  
殘疾瘡疥體氣刑餘喪過之人不與先期出給告示于  
東西長安二門張掛曉諭行准吏部驗封清吏司并詹  
事府主簿廳手本查得吏部左侍郎顧鼎臣姪病故於

四月初二日聞喪係期年服扣至嘉靖十四年四月初  
二日服闋吏部左侍郎霍韜出嫁堂妹病故於四月二  
十八日聞喪係小功服扣至本年九月二十八日服闋  
又堂弟病故七月十八日聞喪係大功服扣至嘉靖十  
四年四月十八日服闋等因通回報到司案呈到部看  
得吏部左侍郎顧鼎臣霍韜奏稱本年孟冬祫享太廟  
時享世廟伏蒙欽遣臣等捧主奏乞講明禮制應否迴  
避乞賜裁定永爲遵式一節大意曲引古禮以其所居  
之職擬於古之諸侯自絕期喪不遵律例迴避欲要入  
廟捧主而已臣等看議得國之大事惟祭人情之實惟

喪故喪祭二者吉凶大禮帝王所重者也誠不可不講明焉我朝稽古定禮首嚴祭祀尤重喪服謹按大明律祭享條下凡大祀廟享所司知有總麻以上喪或曾經杖罪遣充執事及令陪祀者罪同罰俸錢一月若有喪有過不自言者罪亦如之此我太祖高皇帝欽定之律凡五品以上官得與祭者自總麻以上喪皆聽迴避制也禮也今侍郎顧鼎臣霍韜具奏引古禮期服諸侯絕大夫降之文而以今之居公卿位者擬於古之諸侯又以古之諸侯猶今之守令則似大不倫矣夫封建法廢而罷侯置守則世無諸侯久矣歷代官制沿革不同我

朝稽古建官雖倣周禮而九品之制亦無所謂公卿之秩古之諸侯建邦啓土世有其國於分君也其伯叔父兄弟皆臣也故期服可絕今日臣僚在位者卽是公卿亦當絕期服不知今之所謂公卿者果能偃然以君道自處而可以臣其伯叔父兄弟否乎且古有列國諸侯亦有王朝公卿卽王朝公卿亦每亞諸侯一等卽古之公卿亦不敢擬於列國諸侯况在千載之下事體有不同者乎又曰在位則爲公卿釋位乃有族屬凡臣僚五品以上皆無迴避期服之禮是何言也且旣以侍郎爲公卿擬諸侯矣而又令五品官皆不避期喪是今之

五品官皆公卿也既以古之諸侯猶今之守令矣是今之爲公卿者亦猶守令也此惡可同也夫喪服之制人情之所由生也豈以在位釋位爲有無隆殺哉信如所言則是知貴貴而不知親親有爵位而不復有恩義矣是何其教民以薄也又謂凡言喪者謂其身澁之者也身澁之者以其穢也而又曰聞訃爲位及同居遭喪致愴感焉迴避吉禮可也若踰旬月皆無容於避矣此皆任情杜撰之言於禮無考也於典無據也夫喪服者因人情之哀而制之者也哀有淺深故服有輕重是故爲之三年期年爲之九月五月三月此定則矣故定之三

月哀不能忘於三月也定之期年哀不能忘於期年也是故祭祀吉禮也所以致誠於神明者也若有喪者情未忘於哀則不能致其誠於祭而日以其不身澁其喪與夫時之過皆可無避斯言也臣等實未之前聞也卒言彼執律例而不通其義者又將議其爲戾則又大非矣誠大戾矣我太祖御製大明律序曰朕有天下倣古爲治明禮以導民定律以繩頑則律令之作固出於禮義之精微也朱子謂律是從古來底蓋不但秦漢而下三代之法固寓於中矣且律文簡奧非曲學俗儒所能領會宋莒公曰律應從而違堪供而缺此六經之亞文

也今日二臣有是之請蓋未達律文從違之義矣會謂律例禮義有不同者哉爲人臣者誰敢棄律令而不守哉臣等仰惟陛下以其言爲亦當者若曰重宗廟之事而不復顧其私云爾然實則以私而妨公矣失輕重之分矣聖明之下固已燭其微矣臣等忝列禮官實有綱常倫理之責二臣之言棄禮爲甚不敢不按據古禮爲陛下詳言之夫禮曰喪多而服五是五等之服皆喪服也故斬衰唯而不對齊衰對而不言大功言而不議小功總麻議而不及樂此哀之發於言語者也大功之喪不食醯醬小功總麻不飲酒醴是哀之發於飲食者

也大功貌若止小功總麻容貌可也是哀之發於容體者也大功七升八升九升小功十一升十二升總麻十五升去其半有事其縷無事其布是哀之發於衣服者也夫大功小功總麻服漸輕矣而皆不能無哀焉况期年之喪乎今鼎臣期喪也韜大功之喪也而乃欲忘哀以從事於宗廟是與古人制禮之意大相遠矣傳曰君子不奪人之喪亦不可奪喪也不奪人之喪者謂不奪廢他人居喪之情也不可奪喪者謂已居喪之情不可爲他事所奪廢也要使各得盡其禮耳我太祖欽定律令凡總麻以上喪不令陪祀許迴避者是以天子之尊

不肯奪廢人居喪之情也而二臣乃自忘居喪之情而自奪廢其禮不亦異于君子乎禮曰如諸父昆弟姊妹之喪則既宿則與祭卒事出公門釋服而後歸蓋既宿者謂祭前三日將祭之時既受宿戒若遭喪則亦須畢公家之事而後釋服以歸可也今二臣之喪則前於祭矣乃欲棄喪以與祀事則斯禮也亦臣等未之前聞也况禮曰小功總麻執事不與禮執事者謂擯相也禮謂饋奠也夫小功總麻但可執事至於饋奠之禮重則不敢與也今二臣所服之喪非小功總麻皆服之重者也太廟捧主實兼饋奠禮之重者也以服之重者而與

夫禮之重者是得謂之知禮乎禮又有日期之喪卒哭而從政從政者謂庶人供力役之征也夫庶人有期之喪尚須卒哭而後供役今爲士大夫乃冒期喪大功而與於禮是今之士大夫守禮不若古之庶人矣且唐開元禮凡散齋致齋遇有大功小功喪必離齋次還家其將作監元亘當攝祭昭德皇后廟猶以私忌日辭焉昔謝安以期功之喪聽樂王坦之深議其非而安不能聽卒成晉氏風俗之靡祝欽明爲宰相當祭而匿忌日坐貶申州刺史則古人嚴祀禮重喪律在晉唐且然不獨三代爲然也臣等切謂禮義中正之極載在禮經朝廷

法禁之嚴具有國律矧我皇上崇古尚禮度越百王方稽經定制以垂萬世綱常之則而臣等職司典禮敢不據經守正以嚴僭踰之防若依阿承順以苟從二臣之請則紊亂太祖成憲滅棄先王彛訓實自臣等始矣且陷二臣得罪名教將傳笑天下貽譏後世臣等不得不任其責况二臣之服制歲月有期宗廟有事之榮尚可與於他日而禮失不可復追法亂難以定守所據鼎臣韜服制未滿相應在其迴避伏乞別遣大臣二員代其捧主則倫理厚而禮教明憲典遵而法守定矣

嘉靖十三

年九月廿七日具題廿九日奉旨原命官鼎臣韜着迴避應捧主官你部裏擬來看

恭建宗廟疏

祠祭清吏司案呈照得建造文祖世室昭穆廟宇已經題奉欽依於本年十月十六日午時治木所有一應事宜呈乞議處案呈到部臣等於是日會同內官監太監高忠內閣大學士張孚敬李時武定侯郭勛吏部尚書汪鋌工部尚書秦金右侍郎甘為霖錦衣衛署都指揮使陸松指揮僉事陳寅禮科右給事中田濡雲南道監察御史魏有本等議得仰惟太宗文皇帝功德隆盛我皇上特建文祖世室乃百世不遷之廟比之昭穆廟宇禮宜加崇庶稱追報之意臣等計擬得文祖世室前殿

通高五丈一尺九寸五分比昭穆前殿高一尺四寸五分世室寢殿通高三丈四尺二寸五分比昭穆寢殿高五寸謹畫圖貼說隨本進呈御覽伏乞聖裁發下該衙門欽遵如式建造其太廟兩傍隙地今擬建廟之所內有桃杏等樹大小共一百三十二株原非護廟林木相應伐去庶便築基再議得做工軍匠人等搬運木石甃瓦等料既不當由承天門出入又別無道路可通合無俱令於長安左門入至承天門東角紅牆與衆行小橋相對去處暫闢一門以通工役往來候工完之日仍復照舊如法砌塞其伐木開門合候命下本部行令欽天

監於興工之前各另擇日徑自具奏惟復俱候興工之吉同日舉事

嘉靖十三年十月十八日具題十九日奉旨是皇祖太宗世室還着再擬增加來看作便門伐樹株待興工之吉一併行



宦官詐傳令旨乞行究治以除姦亂疏

儀制清吏司案呈奉本部送准都察院咨稱准禮部咨  
該本部題稱爲照榮澤王表檄奏稱親王薨絕乞命倫  
序相應承襲晉王繼妃王氏所奏親王薨故絕嗣乞推  
倫序襲爵二項事情俱該禮部查擬題奉欽依新典暫  
着掌管府事尙氏行撫按查勘其表檄奏稱親王累薨  
及家奴累肆大惡欺毆郡王成傷并知燿奏稱徐通毆  
死伊父二項情節先該巡撫陳都御史會同巡按王御  
史查勘明白將應問人犯徐洪等各擬應得罪名及衆  
奏承奉徐通等各違法事情榮澤王未封長子知燿違

訓前來已經本院覆題前項欽依行撫按將各犯提問  
發落及長史司啓王切責知燿去後續該王巡撫奏問  
徐通等招罪已將徐通問擬比依奴婢毆家長之期親  
者律絞秋後處決徐儒等各杖罪俱遇蒙赦宥各革職  
役爲民還職復役訖及查得先次問完犯人安然徐洪  
所犯罪名似在應赦之內但各犯蒙題奉旨發遣人犯  
委的情罪深重合無照例發遣等因奏請前來亦經本  
院覆奉前項欽依咨行本官遵照去後所據尙氏入府  
年月并表環奏稱嚴督行查以正風化及新典所奏族  
祖謀管府事不遂因而構害各事情俱經司禮監監丞

孫恩會同撫按三司等官及宗室人等節經勘問尙氏  
入府年月幼小及至長成端和王方納爲妾年歲與冊  
原無差繆入府之初即命與端和王作伴並無經侍恭  
裕王爲妾及榮澤王表環所奏情節已勘明白俱與新  
典並無干礙其倫序應否承襲封爵係隸禮部掌行本  
院通將始末文卷印封送部伏乞勅下該部查照徑自  
覆請施行等因具題奉旨是欽此欽遵咨送前來查得  
嘉靖十二年七月內該欽差司禮監監丞孫恩欽差提  
督鴈門等關兼山西巡撫陳達等官各題爲姦賊蒙蔽  
扶立綱常嚴督行查以正風化等事據山西按察司等

衙門會呈問得犯人荆文禮招年三十二歲係山西平陽府蒲州人以農民見充晉府長史司禮房司吏有已薨晉靖王嫡第二子新化恭裕王嫡生已薨長子端和王洪武二年晉恭王分封山西有河南懷慶府河內縣籍在官尚賢已故遠祖尚忠從軍跟隨前來羣牧所着伍聞說尚忠傳稱回回後尚忠生已故尚益尚益生已故尚通尚通生已故尚賢娶太原前衛已故舍餘李昇今故女李氏爲妻至弘治十一年十一月二十四日生伊見在女尚氏名喚小梅兒李氏病故尚賢又娶太原左衛未到軍餘田信伊在官妹田氏爲繼室生伊男尚

賓弘治十五年二月十七日尚賢因爲艱難將尚氏比年五歲受銀三兩布二疋米麥各一石憑在官鄰人吳江蘇相作中賣與恭裕王改名尚伴兒令宮妾胡氏看管就與端和王作伴恭裕王並無收入爲妾正德八年十月十九日恭裕王薨逝尚氏與老幼宮眷俱隨端和王居住後尚氏年長成人端和王因而納收爲妾至正德十二年正月十一日尚氏生今庶長子已請名新典端和王知有事例王府子女不許選配本府軍校之家尚氏係羣牧所人於例有礙却將尚賢捏係陽曲縣在城都民又捏禮聘尚氏爲妾今去任教授江早不合依

聽造報玉牒冊內轉送長史司有去任左長史曾誠并散拘在官右長史張曦役滿未到該吏郭德正孟慶明知前情各亦不合不行舉正正德十三年六月十三日端和王妾楊氏庶生第二子已請名新壻江早等前罪俱遇蒙赦宥各又不合不行首正嘉靖四年端和王薨逃節造玉牒文冊有張曦并去任左長史許堂散拘在官左長史馬朋新化王府在官散拘教授郭瑁荆文禮等各明知前情各不合扶同造報冊內端和王庶長子新壻襲封新化王奏行禮部查得新壻生母尙氏入府年月未明相應勘保請封查議覆題間晉靖王孫晉王

薨絕有晉靖王庶生第六子今薨榮澤王倚恃親枝要管府事開稱思得本爵與先薨新化等王俱係晉王近枝若繼襲王爵則新壻新壻似爲相應若暫管府事則年幼未諳事體相應親枝郡王暫管逼令未到教授梁木具申長史司具啓晉王今薨妃王氏令未到承奉朱勝馬朋等查議具啓不從榮澤王因而嗔恨比蒙王妃因晉王絕嗣令馬朋宋勝等議應繼之人伊等查得晉靖王嫡第二子恭裕王庶長孫新壻倫序相應當請入府靈前奠畢出府王妃於本年二月初三日奏行間有榮澤王不忿捏稱新壻係端和王長子妄引古禮長子

不得爲人後新塹當襲端和王爵新塹當襲晉王爵以繼嗣等項情詞具本與王妃各奏行禮部行間有晉府長史司亦將榮澤王令教授所申要管府事前情具申禮部查得新塹係新化王庶長子倫序相應主喪管理晉王府事待服滿日本府另行奏請遣官冊封爲晉王及查累朝舊例親王絕嗣郡王入繼親王封爵其本枝郡王不得復請繼封其次子止封鎮國將軍榮澤王所奏難以准從又查得妾媵尙氏入府年月扣算端和王年方六歲不應使立妾媵來歷不明相應查勘題奉欽依新塹暫着掌管府事尙氏還着撫按官查他入府年

月明白來說移咨都察院轉行撫按衙門案行按察司會同都布二司查勘間新塹奉命管理府事訖有榮澤王心愈不忿及見查勘尙氏來歷將端和王原捏尙氏父係陽曲縣貫籍實情及添捏恭裕王買尙氏入府收用爲妾伊子端和王將尙氏烝淫生子新塹造報玉牒又將尙氏捏作成化二十年及因尙賢遠祖傳聞回回輒將大明律條蒙瞽色目人聽與中國人爲婚姻務要兩相情願改作不可與中國人爲婚姻等項情詞奏行禮部看得榮澤王又添烝淫之事與先奏詞不一其間必有別故况係宗室重情又涉宮闈隱跡事體重大合

無簡命司禮監官一員請勅前往晉府會同撫按衙門會勘明白具奏上請定奪題奉勅差司禮監孫監丞前來會勘間本年三月榮澤王薨逝五月蒙孫監丞會同撫按等官行提文禮等并端和王妃父楊溥及內使鞠安錢定等到官從公會勘前情又蒙審據尙賓執稱傳聞遠祖人稱回回賓家自祖父以來養猪喫肉及婚喪俱與人同並不知習回回教門及查冊內尙忠尙通止有從軍籍貫並無回回字樣亦無尙文尙順名姓在內隨弔玉牒文冊查得恭裕王位下宮妾原無尙氏端和王位下宮妾尙氏係尙賢女妾係弘治十五年入府正

德十二年生庶長子新塏又審據鞠安等執稱尙氏兒年三十六歲并取各府宗室人等重其結狀尙氏入府來歷年月并見今歲數與前相同行間本月二十四日王妃薨逝本月內蒙孫監丞會行長史司請各應審靖安等王及各王府將軍等并榮澤王長子知燿及新塏於本月二十七日捧勅到府審究尙氏等前項來歷衆稱委與前詞無異隨蒙孫監丞親入本府小書院調到本府內官韋慶解鳳武勝郝繡及各王府內使某某等令其相兼守門防候喚集尙氏并已故恭裕王見在妾王氏天順成化弘治等年本府年老知證宮人陳閏喜

郭妙會蘇添喜等再四研審衆執尙氏委係尙賢之女  
比年五歲恭裕王買與端和王作伴後爲妾並無經侍  
恭裕王又蒙令各送飯給聽審人食用內有猪肉親見  
尙氏喫畢及勘得尙氏年貌與鞠安等所執相同審勘  
的實取具各親供二紙出外會同撫按等官覆問靖安  
等王及將軍等所執相同就於會案簿內各畫押字並  
無扶同異詞蒙將前供詞二紙及會案押字簿一扇會  
發按察司再行會問又蒙張廉使等將文禮等一千人  
證覆審前情明白問擬文禮不應杖罪并江早等具招  
通行叅呈蒙司禮監孫監丞陳巡撫俱批看得事情重

大勘問恐有未的且又查無旌德王府教授其結有礙  
奏請該司即便會官再行研究務要逐一的確另招通  
行叅呈以憑施行蒙行長史司轉行羣牧所覆勘得尙  
賢來歷與前相同并取該府教授結狀呈繳按察司又  
蒙會官覆審前情明白除長史等官馬朋等先行摘發  
外將文禮取問罪犯會議得荆文禮所犯合依不應得  
爲而爲之事理重者律杖八十有大誥減等杖七十再  
照已薨榮澤王奏詞審虛未到田信等係供狀人並免  
追提江早會誠等俱另行等因具招叅呈到臣案照先  
准禮部揭帖該晉府榮澤王表檮奏前事本部覆題爲

照晉王薨逝無嗣先該晉王繼妃王氏奏以新塏倫序  
當及相應承繼夫爵查照玉牒枝派新塏委係倫序應  
及但又查得伊母入府之時知嬪年方六歲不應便立  
妾媵係是生母來歷未明題奉欽依通行撫按官查勘  
前項事情及暫令新塏主喪管理府事今該榮澤王又  
奏前因若使是實則新塏不但不可襲封親王其應得  
名封於法俱當查革該府官僚扶同欺罔干犯憲典罪  
難輕貸先次奏請名封之時迄今已十餘年榮澤王不  
行舉正止因近日議襲王爵又因本部奏行查勘方將  
前事指奏及又添出丞滌之事與先二次奏詞不一其

間必有別故干係宗室重情又涉宮闈隱跡事體重大  
合無簡命司禮監官一員請勅一道前往晉府會同彼  
處撫按官及該府宗室具啓晉王繼妃會集年老宮眷  
及內使人等審勘尙氏來歷虛實等情有無節次扶同  
隱匿情弊及先次行勘事情一併會勘明具奏上請定  
奪如係榮澤王造誣構釁敢於陷害宗親另有宗室人  
等陰肆謀奪撥置奏擾亦要從公指實叅奏請自宸斷  
等因奉旨是這該府事情依擬寫勅差司禮監官一員  
前去會同撫按官及該府宗室人等從公審勘明白來  
說欽此欽遵備行前來及欽奉勅司禮監孫監丞先該



禮部奏將晉府管理府事庶長子新煥繼封事情行勘未報續該本府榮澤王亦奏新煥不應承襲及其生母尙氏來歷不明等情係干宗室重事又涉宮闈隱跡其間恐有誣構陷害情由必須細加研審方得其真今特命爾前去會同彼處撫按官及該府宗室啓晉王繼妃會集年老宮眷及內使人等審勘尙氏委係何處何人之女何年月入府是否色目人所生曾否先年經侍恭裕王後知熸收爲宮人長史等官有無節次扶同隱匿情弊及先次行勘事情一併會勘明白具奏定奪如有構害撥置等情亦要從公指實奏區處爾爲內臣受

茲任使宜竭誠盡力密切體訪務得其情斯爲爾能爾其慎之故勅欽此欽遵臣於本年五月十一日前到山西省城會同撫按官案行該司會同都布二司勘問回報本年五月日王妃薨逝本月日據各官將審取過犯人荆文禮等及會同宗室人等歸一緣由引審前來臣等當行長史司請各應審靖安等王并各府管理府事各將軍聽宣勅諭隨該臣親自入府喚集尙氏并年老知證宮人陳閏喜等內使鞠安等再四研審的實取各親供出外會同撫按多官覆會靖安等王及將軍表權等審勘相同就於會藁簿內各書押字存照續據各官

將會問招由呈報到臣爲照事情重大恐有未的又經密切體訪及駁行該司會問去後今據前因會同撫按覆詳無異將荆文禮監候長史等官張曦等行令聽察外再照新化王府去任教授江早扶同上人冒造玉牒因本管而配本王違條犯例改軍籍而爲民籍避影逃形以致奏訐之疊至良爲貽謀之不臧所據本官厥罪匪輕晉府長史司去任左長史會誠見任右長史張曦是非止據文移造端乖戾虛實不能根究依樣糊塗所據各官比之江早情罪稍間見任教授郭瑁輔導之獻可替否之才籍貫襲承誤踵訛之陋去任左長史許堂

見任左長史馬朋及與張曦事仍舊貫曾覺正之未聞職掌藩寮誠曠瘼之有媿以上各官罪應末減臣等又議照奉勅暫管府事新典母尚氏傳聞出於色目然無冊籍可稽見今父子習尚同於中華已有飯食可辨况新典係是端和王知熾所生庶長親男往事雖舛原於厥子無干一脉既真似於承宗無礙但事體關涉藩國裁斷出自朝廷非臣等所敢輕議荆文禮雖經依律問擬亦未敢輒便發落通乞勅下該部再加查議上請定奪等因俱奉聖旨該部看了來說欽此該本部看得近薨榮澤王表櫻見親藩虛繼遂萌覬覦之心因管府不

成大肆構害之計誣尙氏爲經侍之妾意欲置諸重刑  
目新塏爲丞濞之男謀必俾之失國觀其前後奏詞皆  
是旋添情節設有各項姦弊何不一時具陳卽此推求  
可知誣罔排陷宗親故違祖訓但天奪其魄已殞厥生  
難以再議等情係本部先後題請及查續有榮澤王表  
檄奏稱親王薨故非命及長子知燾奏稱承奉徐通毆  
死伊父二項事情恐干礙新塏封爵已經題奉欽依勘  
報及先據都察院回報前來又經移咨取勘去後今該  
都察院咨稱榮澤王表檄奏稱親王薨薨并伊長子知  
燾奏稱承奉徐通毆死伊父等項情節已勘明白俱與

新塏並無干礙其承襲封爵移咨本部覆請所據新塏  
旣節該都察院勘報明白相應照例襲封爲晉王除金  
寶儀仗相傳應用不造外該用金冊冠服冊文等件通  
行各該衙門撰造完備候各王府冊封之日通行關領  
遣官前去冊封行禮謹奏

嘉靖十三年十二月二十三日具題二十五日奉旨  
是

奉議七廟名額疏

祠祭清吏司案呈奉本部送禮科抄出少保兼太子太保禮部尚書翰林院學士夏言具題本月二十三日伏蒙皇上召見於鍾粹宮面諭臣曰太宗世室并昭穆六廟宜有名額卿其考定來聞欽此臣欽遵聖諭考按禮經竊惟古者天子宗廟三昭三穆與太祖之廟而七其有功德者則立百世不遷之廟不在三昭三穆之數是故太廟合享則太祖東向羣昭列於北牖而南義取向明故稱昭羣穆列於南牖而北義取深遠故稱穆是昭穆之名但有取於南北以叙世無取于尊崇以觀德況

古人廟制以東向爲尊與今宮室之制不同茲欲定建名額恐不當遂以昭穆爲廟名也按祭法有曰考廟曰王考廟曰皇考廟曰顯考廟曰祖考廟然名稱雖實而尊表無文矧第可施於嗣王而不可施於及王故祭法則有而王制則無似亦未見其爲不易之定名也臣謹竊取周制以義起之惟聖明裁焉夫周制曰太廟者太祖廟也文世室文王廟也武世室武王廟也太者太始之義所以尊創業之祖也文武之稱則其謚也古者葬則有謚謚以尊名亦以誅行子之於親臣之於君得通稱也此周人以謚名廟之義見於經可考者也自漢氏

而下更數千餘年襲爲同堂異室之制而先王宗廟之制竟不可復故昭穆之稱無聞歷代旣無專廟故其所稱廟號亦虛名耳我皇上今日復古廟制旣正太祖高皇帝南向之位則太廟之名實符周典又以太宗文皇帝功德隆盛特爲之建百世不遷之廟茲欲立廟定名臣請以太宗廟宜曰文祖世室在左三昭之上仁宗皇帝爲昭第一廟宜曰仁廟宣宗皇帝爲穆第一廟宜曰宣廟英宗皇帝爲昭第二廟宜曰英廟憲宗皇帝爲穆第二廟宜曰憲廟孝宗皇帝爲昭第三廟宜曰孝廟武宗皇帝爲穆第三廟宜曰武廟庶幾功德昭顯而稱號

章明足以爲萬世不刊之定制矣

嘉靖十三年十月廿六日具題嘉靖十四年五月廿四日奉旨卿所考擬廟額俱依行工所製造其昭穆遞遷之義還考議來看

查明侍班禮儀疏

嘉靖十三年十一月初十日該陝西道監察御史楊行中等題照得嘉靖十三年十一月初八日冬至節大祀天子園丘先於初五日傳至文武百官聽受誓戒該臣等於奉天殿侍班糾儀看得東班有翰林院編修周文燭等四員西班並無中書舍人臣等因查得大明會典中書舍人項下一款凡遇萬壽聖節正旦冬至及傳制傳臚等項各分官四員於奉天殿侍班則是中書舍人例該與翰林院官相對侍班以備法從今乃不到事屬故違法當查究緣係是日齋戒日期例不糾舉但事關

禮儀言不容默伏乞勅下法司查究明白以警將來庶朝儀肅而可以永爲遵守矣等因具題奉旨這中書科官侍班全無好生怠玩着錦衣衛查出拏送鎮撫司問欽此欽遵臣等當差旗校張騰等前去中書科查拏初五日傳制侍班不到中書舍人四員隨據掌中書舍人事禮部主客清吏司主事傅榮印信手本開稱隨查本科舊例凡遇萬壽聖節正旦冬至頒詔傳制冊封傳臚等項禮儀必先據禮部手本預取職名分官四員備榜示知至期赴奉天殿侍班自來大祀誓戒侍班本衙門查無舊例禮部亦照舊規不行手本來取職名以此未

會查派且歷年卷簿俱可查考等因開報前來所據該科雖具印信手本開稱前項情由遠難憑信合候命下將掌中書舍人事禮部主事傅榮先行拏送鎮撫司查問明白徑自奏請惟復別有定奪等因奉旨傅榮你衙門且拏了監着禮部查了舊規來說欽此又於禮科抄出署掌中書舍人事禮部主客清吏司主事傅榮等奏嘉靖十三年十月十四日准禮部儀制清吏司手本爲前事十一月初八日冬至節于十一月初一日初二日俱赴朝天宮習儀初九日早行慶賀禮先將侍班官員職名開報以憑備榜施行等因到科准此隨分官四員

至期習儀侍班訖本月初十日抄得監察御史楊行中等一本糾臣等中書舍人於本月初五日誓戒傳制誤侍班等因奉旨中書科官侍班全無好生怠玩着錦衣衛查出拏送鎮撫司問欽此隨該錦衣衛行查臣等聞命驚惶措躬無地卽具手本先行回覆該衛訖臣等查照本衙門歷年舊例凡遇萬壽聖節正旦冬至頒詔冊封傳制傳臚禮儀俱先期准禮部儀制清吏司手本預取職名分官四員備榜示知於奉天殿侍班其誓戒傳制原無分官侍班事例見有歷年案簿可查臣等愚昧委的因循舊例不敢分派官員輕入殿廷若翰林院每

遇誓戒傳制應否侍班官員亦有歷年舊例可查臣等伏思誓戒傳制聖王大禮設有侍班舊例臣敢故違罪當萬死但念事出無據以致失誤情實可矜伏望聖慈俯賜恩宥仍乞勅下禮部查明舊例應否有無以便遵守臣等不勝戰慄感激天恩之至等因奏奉旨禮部一併查明來說欽此欽遵通抄送司行准翰林院手本查得凡遇萬壽聖節冬至正旦等項大禮本院查照舊規自修撰以下挨次侍班其餘傳制等項本院惟照舊規挨次侍班原不行取職名亦無文卷可據今將嘉靖十三年進春進曆侍班官員職名理合回報等因又行准



中書舍人手本查得嘉靖十年十一年十二年萬壽聖節并冬至正旦每節分官四員侍班其誓戒傳制與進春進曆等禮歷年案簿亦不曾分官侍班及查嘉靖十年以前弘治正德年間以後案簿俱存可照等因各回報前來隨查得大明會典內開凡聖節冬至正旦大朝賀及頒詔進實錄等大禮翰林院修撰等官四員於奉天殿寶座東向西與中書舍人對立侍班又中書舍人項下一款凡萬壽聖節正旦冬至及傳制傳臚等項各分官四員於奉天殿侍班今該前因通查案呈到部看得錦衣衛掌衛事署都指揮使王佐等題稱奉旨查拏

初五日傳制侍班不到中書舍人四員隨據掌中書舍人事主事傅棨印信手本回稱自來誓戒傳制原無侍班歷年案簿可查所據該科前項緣由遽難憑信乞要將傅棨先行拏送鎮撫司查問明白奏請及署掌中書舍人事禮部主客清吏司主事傅棨等奏稱凡遇萬壽聖節正旦冬至頒詔冊封傳制傳臚禮儀分官四員侍班其誓戒傳制原無分官侍班事例見有歷年案簿可查設有舊例豈敢故違乞要查明應否有無以便遵守各一節爲照大明會典翰林院項下開載朝賀等大禮而未明言傳制中書舍人項下開載傳制等項而未明

言誓戒然大禮傳制字樣自是該載已盡今據翰林院中書舍人回報前來則是翰林院自嘉靖十二年以前有無不一原無憑據止於今歲進春進曆等項方行查照會典逐一挨次待班惟中書舍人止憑舊案有無分派不會與同翰林院查復會典以致彼此不一今歲進春進曆亦未派有侍班官員及稱嘉靖十二年以前弘治正德年間以後案簿俱存可照則其錯誤相沿已非一日承襲舛謬已非一人祇是今歲誓戒傳制御史楊行中等方行糾舉若論其從來委的因襲年久恐罪不可遽坐一人况翰林院係循復舊典而中書舍人則因

仍故事彼此互異原無定規所據傳檄情非故犯罪有可原似宜俯從寬宥伏乞聖裁臣等再照前項誓戒傳制等項該用翰林院中書舍人侍班祇緣大明會典開載互有詳略而拘泥故牘者又多不敢率意加增理宜申明以便遵守合候命下本部行令中書舍人并翰林院凡遇萬壽聖節冬至正旦朝賀例該習儀者本部先行查取侍班職名外其頒詔進實錄并每年冊封誓戒及但凡傳制并傳臚進春進曆與夫御殿朝賀等項翰林院中書舍人俱合遵會典分官四員侍班先期會同不得仍襲故弊致使殿廷之上侍從班列左右偏虛若



有違誤聽鴻臚寺掌禮官糾儀御史舉奏如此庶禮制  
定而朝儀肅矣

嘉靖十三年十一月廿一日具題廿三日奉旨這侍  
班禮儀你部裏既查明今後都照這例行傳祭既罪  
有可原饒他欽此

明職掌以嚴銓選疏

祠祭清吏司案呈查得嘉靖十三年十月二十日該吏  
部大選官員選過醫官張夢龍蘇方李鑑陰陽官梁豸  
僧官繼經等俱未經由本部咨送銓選伏查大明會典  
一款凡天下府州縣舉到醫士堪任醫官者俱從禮部  
會考中者送吏部選用不中者發原籍爲民原保官吏  
治罪欽此又查得先爲正姦弊清朝政以圖治安事該  
本部題奉欽依諸司職掌天下府州縣起送陰陽醫生  
頂補陰陽醫官員缺俱經本部查勘明白劄付太醫院  
欽天監本部仍委該司官一員公同考試如果術業精

通者轉行吏部銓選考不中者發回原籍爲民及舉保  
僧道襲官皆從本部叅勘無礙轉發僧道錄司考試中  
式轉咨吏部銓選其陰醫僧道中間雖有援例免考者  
止是免其考試其起送緣由必從本部叅勘無礙轉咨  
吏部銓選况前此援例免考經由本部咨送者歷歷可  
考日日有行及查嘉靖四年八月內該河南等處陰醫  
僧道李九成等嘉靖十一年五月內該鳳陽府僧人演  
真俱不由本部咨送徑自收選已經申明職掌移咨吏  
部及咨都察院轉行在外巡按御史提問各該故違官  
吏去後今該前因查得陝西鄜州醫官張夢龍鞏昌府

徽州陰陽官梁豸直隸保定府雄縣醫官蘇方順德府  
南和縣醫官李鑑僧官繼經等各官俱徑申送吏部該  
部徑自選補訖及稟堂行據該司回報却以援例免考  
爲辭查得順天府三河縣陰陽訓術岳璣於嘉靖十年  
遇例納銀七十兩徑送吏部該文選清吏司手本開查  
岳璣原無禮部咨文中間恐有詐冒等項情弊難在收  
選連人駁回仰取具該州縣官吏人等各不扶并結保  
送禮部轉咨前來以憑施行等因該順天府遵依重具  
結狀起送前來於嘉靖十三年四月十一日咨送吏部  
訖此該司近日所行之事自可查證豈得輒自矛盾委

屬違越職掌紊亂事體案呈到部看得各處起送醫官  
陰陽官僧道官俱從本部考送選用具載會典其有納  
銀免考者亦由本部叅勘無礙轉咨吏部銓選此係職  
掌舊規見行事例前此已經本部兩次申明內外知悉  
今張夢龍等乃不由本部徑赴吏部投文該部不行查  
審徑自選補委於職掌舊制及節奉明旨有違法當舉  
正合候命下移咨吏部將選過張夢龍等五名選除醫  
官等職先行革退及咨都察院轉行各該巡按御史行  
提各犯到官并司府州縣承行官吏問擬應得罪名具  
由回報遺下員缺另行保送仍乞天語申諭該部今後  
務宜恪守朝廷典制無得任意紊更以滋姦弊庶職掌  
明而銓選嚴矣

嘉靖十三年十一月廿四日具題廿七日奉旨張夢  
龍等并承行官吏着各該巡按御史提了問今後都  
照舊規行

南京太廟疏  
前事行該守備南京內官等監太監潘真等南京司禮  
監併送南京神宮監南京尚膳監及南京奉先殿司香  
南京內官監左監丞馮安等揭帖并南京太常寺光祿  
寺呈俱同前事各開查報南京奉先殿每月朔望并歲  
時節令祭祀獻新每日進膳品物禮儀并南京太廟每  
日早司香儀節及每月灑掃抹拭葺修等項緣由前來  
查得南京太廟原日止是每日早該南京神宮監官進  
入司香別無祭享禮儀而南京奉先殿有每日早午膳

南京太廟疏

祠祭清吏司案呈奉本部送准南京禮部咨准禮部咨  
前事行該守備南京內官等監太監潘真等南京司禮  
監併送南京神宮監南京尚膳監及南京奉先殿司香  
南京內官監左監丞馮安等揭帖并南京太常寺光祿  
寺呈俱同前事各開查報南京奉先殿每月朔望并歲  
時節令祭祀獻新每日進膳品物禮儀并南京太廟每  
日早司香儀節及每月灑掃抹拭葺修等項緣由前來  
查得南京太廟原日止是每日早該南京神宮監官進  
入司香別無祭享禮儀而南京奉先殿有每日早午膳

饗有每月朔望歲時節令祭祀有獻新品物該南京光祿寺大庖厨等處造辦南京司禮監每日輪差僉書官員長隨內使進內宿歇點視司香官員并南京尚膳監人員造辦膳饗閱視豐潔獻供祭祀獻新品物該南京太常寺等衙門供進一應事宜遵行已久看得南京太廟原日與南京奉先殿禮儀同異大節如此為照南京太廟原無祭享進膳禮儀而奉先殿備舉膳饗祭祀獻新之禮今奉欽依不復重建南京太廟而南京奉先殿之所奉祀固即原日南京太廟中列聖神位所有南京太廟原日香火南京神宮監官合無每日仍赴南京奉

先殿司香用存誠敬其南京奉先殿一應進膳祭祀獻新禮節事宜亦合照常祇肅崇奉今照前因除查過南京太廟原日與南京奉先殿進膳禮儀緣由用備典禮事實合行移咨查議施行等因咨部送司案查先該本部等衙門會題南京太廟事宜節奉聖旨南京奉先殿香火併日進膳儀禮部查議了來看遣官祭告亦無謂待查明香火進膳一併區處各該衙門知道欽此隨該本部議得南京奉先殿香火并日進膳儀本部原無著令其南京太廟中原日香火與南京奉先殿進膳禮儀有無加損同異俱無所考合行南京禮部查議明白回

報以憑奏請定奪等因題奉聖旨是欽此已經備行該部欽遵去後今該前因案呈到部看得南京禮部咨稱南京太廟原日止是南京神宮監官每日早進入司香別無祭享進膳禮儀南京太廟司香官合赴南京奉先殿司香其南京奉先殿一應進膳祭祀獻新禮節事宜亦合照常祇肅崇奉一節既該南京禮部欽遵查議明白前來則南京太廟惟有每日香火原無進膳祭享禮儀別無可以歸併事宜其南京奉先殿日進膳儀并獻新及時節祭祀禮儀俱合照常供奉難以加損但南京太廟司香官員合無准議增入奉先殿供奉香火惟復

別有處分其祭告之禮仍乞俯從臣等前次所請御製祝文一道本部行令太常寺備辦香帛欽遣廷臣一員齋捧前去擇日祭告惟復就遣彼處大臣行禮伏乞聖裁

嘉靖十三年十二月初六日具題初八日奉旨是遣撫寧侯朱麒行禮其餘依擬

桂洲奏議卷第十六



Table of contents for Volume 8 of the 'Guizhou Memorial' (桂洲奏議). The text is arranged in vertical columns, listing various memorials and their titles. The characters are somewhat faded and difficult to read in detail.

桂洲奏議第十七卷

南宮集卷之八目錄

數

恭建宗廟疏

奉議吉凶並舉禮分重輕疏

奉議羣廟一應合行禮儀疏

欽奉勅諭太廟修飾崇新疏

欽奉聖諭羣廟百度合宜疏

奉議莊肅皇后請謚疏

覆議莊肅皇后請謚疏

莊肅皇后冊謚禮部具儀疏

欽奉聖諭疏

祭祀疏

奉勅考訂儀文曲禮疏

奉諭議孟夏薦麥及賜百官麥餅疏

請定宗廟雅樂疏

興隆寺火災乞順天意永絕異端疏

議處興隆寺僧衆疏

議興隆寺僧衆及田地器物疏

議處王子嫡庶爭襲疏

請增添協律贊禮司樂等官疏

宗廟名額疏

以上十四年五月以前稿

桂洲夏文愍公奏議第十七卷

敬

門人

涇縣左

鎰

編輯

宣城貢汝成

校正

華亭徐

階

武進薛應旂

裔孫 之瑞 之琳

重訂其

灑全校字

南宮集卷之八

禮部題

恭建宗廟疏

祠祭清吏司案呈奉本部送禮科抄出欽天監監正夏  
祚等題先該禮部題稱建造文祖世室昭穆廟字節奉  
旨作便門伐樹株待興工之吉一併行欽此備行到監

謹擇興工於本年二月初八日辰時吉開便門伐樹株  
本日午時吉等因奉旨是禮部知道欽此欽遵抄出送  
司案查先爲恭建郊壇該本部題奉欽依議擬告廟儀  
注上請節奉旨告廟儀衛照常朝所設者其餘依擬行  
欽此欽遵外今該前因案呈到部臣等竊以今日七廟  
之建乃我皇上特尊太祖遵復舊制蓋以遠跡三代之  
隆一正千古之謬甚盛之舉與分建郊壇事體相同本  
部查有前項郊壇告廟禮儀合候命下行令欽天監於  
興工之前擇日具奏翰林院撰文太常寺備辦祭祀香  
帛至期恭候聖駕躬詣太廟祭告請命於列祖告聞皇  
考於世廟所據行禮儀注臣等謹遵照郊祀告廟儀注  
參酌議擬一通隨本進呈御覽伏乞聖裁  
嘉靖十四年正月十七日具題二十日奉旨是

奉議吉凶並舉禮分重輕疏

嘉靖十四年正月二十五日該大學士李時本部尙書  
夏言伏蒙皇上召見於文華殿右室欽奉聖諭皇考世  
廟以迫近河水久議移改前日面諭卿等當同七廟之  
吉興工但今七廟之建以統於太祖之尊又限以地勢  
規制頗殺今擬世廟重建於太廟左方實與太廟加近  
宜於舊規亦須少殺於列祖之廟不至相踰庶稱朕尊  
祖之意免豐昵之嫌卿部裏可於二月初四日會官相  
度來聞告祖請命改於興工前一日行欽此欽遵臣等  
欽承聖諭仰見皇上孝思至情守禮至意真足以昭假

列祖垂法萬世臣等無任欽服看得欽天監原擇定七廟之建於二月初八日興工告祖請命於二月初四日行禮茲奉聖諭合請聖駕於二月初七日告於太廟并告聞於世廟本部仍會同內閣司禮監內官監工部欽天監并原領勅在工官員欽遵於初四日前詣太廟之東逐一相度世廟基址深廣丈尺并定擬規制具聞以俟聖裁俱候命下通行內外衙門欽遵施行等因題奉聖旨廟建大事禮之至吉今既卜吉宜速奉造但時非古比或有以皇兄后喪爲不可即舉行者爾禮部還行部院司寺翰林科道等官作急議了來說不許回從退

言各盡所謂欽此欽遵通行吏部等衙門太子太保尙書等官汪鉉等各咨報前來看得吏部回稱議得宗廟復古乃萬世不易之制建造興工實國家至重之務先既卜定吉期理宜從吉爲是戶部議得大行莊肅皇后之喪固不可輕而宗廟之建用妥列聖神靈之所於禮尤爲至重况先該羣臣會議相同即今擇日興工已有成命相應舉行兵部議得大行莊肅皇后之喪固重典也建宗廟享祖宗尤重典也况羣臣合謀卜吉既定固無所妨刑部議得事有大小禮有重輕小不得以妨大輕不得以踰重工部議得禮必統於所尊孝莫先於所

重廟制既奉聖諭改建委應協吉從事都察院議得建立九廟主之者皇上也皇上於莊肅皇后服制既無則於九廟興工似無相碍况尊祖事大已定吉期似難以無服之喪停止不舉通政使司議得廟建大事禮不可以或緩卜吉興工人心允愜揆之莊肅皇后喪禮輕重原不相妨大理寺議得建廟復古誠爲盛典卜吉興工尤係重務皇上於大行莊肅皇后服制既無相妨則該部所議興工日期相應舉行翰林院議得宗廟復古乃曠世未舉之典今卜日興工國家已有成議固不得以一時之偶遇而遂稽萬古之宏規也吏科等科議得修

廟敬祀所以崇先審時達變所以建事故吉期若可以遲卜而綸言則難於屢更况至孝至情昭假列祖凡百臣工孰不仰廟謨而敬承者乎河南等道議得廟制復古乃萬世之大經改建興工實國家之重務協卜有期理宜從吉通據前因到部臣等看得部院司寺及翰林科道之議同然合辭已無異說皆知宗廟事重不當以喪禮輒止事在舉行無疑臣等待罪禮官竊惟尊無二上禮有權宜宗廟興工卜云既吉難以易期况書稱元祀十有二月朔伊尹祠于先王奉嗣王祇見厥祖則古者凡國大事皆不用凶服至于宗廟尤當重祖今皇上

于大行莊肅皇后既非服喪之比則皇上祭告行禮及羣臣有事宗廟者自宜吉服從事庶于廟建之典禮嚴義正無有可議者矣其初四日相度規制初七日告祖請命臣等伏候命下各照原奉欽依舉行

嘉靖十四年正月三十日具題二月初一日奉旨是他每既只這等說况廟制已稽郊禮數歲甚非事天尊祖之道依擬照期從吉行事

奉議羣廟一應合行禮儀疏

祠祭清吏司案呈奉本部送禮科抄出少保兼太子太保禮部尚書翰林院學士夏言題嘉靖十四年二月初六日上御文華殿西室召大學士臣張孚敬臣李時暨臣言面諭今恭建列祖羣廟本爲尊太祖者今太廟既爲太祖之專而廟庭塵舊尤宜咸新庶稱尊崇之意今宜即以明日辰時吉告祖請命之後就恭請入廟帝后神主暫奉安於奉先殿又恭請祧廟四祖神主奉安於太先殿一應合行禮儀便各具奏來行欽此欽遵臣言會同臣孚敬臣時謹議將一應禮儀開坐奏聞伏候聖



裁

計開

- 一 乞簡命捧帝主大臣十員后主內臣十員各具祭服
- 一 太常寺備兩殿奉安祭品香帛
- 一 司設監備神主金輿并冊寶亭衣冠亭各十二座於太廟門外候各官捧主陞輿冊寶衣冠內侍官各捧置亭內俱隨行
- 一 錦衣衛備傘扇儀衛導從
- 一 神主輿冊寶等亭由端門奉天門中左門至後

左門儀衛退捧祧廟主官捧請四廟神主奉安于太先殿捧太廟主官捧列聖神主奉安于奉先殿次日行奉安祭告禮

一 太常寺擇佐捧主執事官二十二員

嘉靖十四年二月初六日具題初七日奉旨是儀衛須直擁護至殿門外捧主并掌禮官已有札子了其餘依擬

欽奉勅諭太廟修飾崇新疏

嘉靖十四年二月初六日上御文華殿西室召大學士  
臣張孚敬臣李時暨臣言面諭今恭建列聖羣廟本爲  
尊太祖者今太廟既爲太祖之專而廟庭塵舊禮儀崇  
飾庶稱尊崇之意欽此欽遵臣等仰見皇上稽正古典  
特尊太祖聿新廟制至德大孝度越前代帝王遠甚合  
候命下本部行移工部內官監及各督工官員即於本  
月初八日興工將太廟三殿并門廡墻垣通行修飾更  
新庶足以稱我皇上尊崇之意而太祖特祀之廟始足  
以專尊於萬世矣

嘉靖十四年二月初七日具題初八日奉旨是督工  
官員着用心整理

欽奉聖諭羣廟百度合宜疏

嘉靖十四年二月初八日上御文華殿召大學士張孚  
敬李時暨臣言恭承面諭卿等昨所擬世廟規制在太  
廟東不免干動林木朕惟我皇考聖心仁儉今朕作廟  
正以安妥皇考神靈不敢不追體皇考之心卿等即今  
日之吉於太廟東南寬隙之地相度定擬來聞欽此欽  
遵臣會同內閣大學士張孚敬李時司禮監太監張佐  
鮑忠張欽韋霽內官監大監高忠并原領勅在工太傅  
武定侯郭勛吏部尙書汪鋹工部右侍郎甘爲霖錦衣  
衛署都指揮使陸松指揮僉事陳寅禮科右給事中田

濡雲南道監察御史魏有本恭詣太廟東南度地一區北止世廟神路南抵承天門東墻通計六十三丈三尺今擬建廟之址南北進深合用三十五丈九寸面闊一十七丈有奇南面廟街闊二十七丈四尺臣等恭看得原建世廟之制前殿九間後寢七間今恭擬新制前殿七間後寢五間其前兩廡原各七間今擬五間後兩廡原各五間今擬三間戟門原五間今仍擬五間其高廣進深丈尺俱各量減及東北便門悉遵照欽定外惟前殿深廣之數既視舊從減則高下亦須與之相稱詳具圖帖伏乞聖裁其宰牲亭神宮監黃瓦房俱各有碍臣

等復相度得太廟正南林木之外抵南墻尙有空地南北六丈有餘今擬移置宰牲亭於空地之左與太廟東墻相直移置神宮監於空地之右與太廟西墻相直移并亭黃瓦房於宰牲亭之前面勢位置俱各合宜通前一應規制屢奉聖諭臣等稟承指授重加度擬似可以仰副皇上尊祖孝親之志矣合候命下之日通行內外衙門欽遵施行

嘉靖十四年二月初九日具題初十日奉旨是廟殿高數從今重擬丈尺行其餘都依擬行

奉議莊肅皇后請謚疏

節該本部題請大行莊肅皇后謚議奉旨是着會官議擬奏請定奪欽此臣等謹欽遵於本月十七日會同內閣府部九卿皇親駙馬科道等官東閣集議大學士張孚敬首曰莊肅皇后與累朝事體不同其冊謚之文只該二字四字臣言曰今在廟列聖元后俱十二字恐二字四字未稱大學士李時曰二字四字太少須得八字孚敬曰禮官何如說臣曰請謚者禮官之職定謚者翰林之事今衆議未協當請上裁都御史王廷相曰莊肅作配武宗今日之謚似宜一體吏部左侍郎霍韜曰謚

者天下之公非天子自行之宜備陳以請臣等竊惟周公制謚法非使臣議君子議父也蓋謚以尊名節以壹惠故大行受大名細行受細名行出於己名生於人匪一時之褒貶實萬世之是非雖以君父之尊必稱天以謚之示不敢私也非以臣議君子議父也故謚也者孝子慈孫百世不能改者也古人尙質謚法尙簡嚴故稱美之言無幾後世帝后之謚始有不一其書者亦臣子尊崇之情所謂禮以義起者也故生今之世則當行今之禮以我朝列聖元后之謚言之高皇后謚曰孝慈昭憲至仁文德承天順聖文皇后謚曰仁孝慈懿誠明莊

獻配天齊聖昭皇后謚曰誠孝恭肅明德弘仁順天啓聖章皇后謚曰孝恭懿憲慈仁莊烈齊天配聖睿皇后謚曰孝莊獻穆弘惠顯仁恭天欽聖純皇后謚曰孝貞莊懿恭靖仁慈欽天輔聖皆十二字也夫大行盛名帝后媲美妻以夫尊禮宜與並今武宗廟謚旣與列聖相同則莊肅謚號似亦不當稍異且今日加上莊肅皇后之謚祇以表行尊名爲典其於服制有無名分尊卑本不相涉夫古人制謚止嚴美惡之法無論謚文多寡但莊肅皇后作配武宗他日神主祔享宗廟若謚文不一雖義無重輕而迹涉減損似無以稱媲美同尊之義此

則在今日所當講者若上冊行禮自當別議儀節以避尊屈之嫌臣等伏思皇上於大行莊肅皇后一應喪儀無不備全於禮乃者本部上請議謚皇上不徑下翰林撰謚必命臣等會官集議者祇欲考據懿行以定謚文以盡人道之始終耳非議字數之增減也况二字四字八字之擬於禮無據而十二字之謚似是出累朝事例臣等敢不仰遵明命俯盡公言伏乞聖明特賜裁定合候命下欽遵施行

嘉靖十四年二月十一日具題十三日奉旨這所議你部裏以爲不合且霍韜所說非天子所自行此言

盡矣故着會議以盡公道你每不加詳擬動輒紛爭是非朕與皇兄雖不同其父母是均一祖無彼此之分前日喪儀朕謂羣臣不可不盡二十七日之制此大義所關爲其臣者亦當思盡所以你每執之他孰肯言今日議謚又有此論又曰服制名分不相干涉夫斯固然矣可無倫理邪况今時謚義非古者比但只是笑字數豈可不有等殺故孚敬之所爭之也朕前已屢諭卿言朕與皇兄義乃手足昔方受命之初猶在藩服有臣子之道今受命即位茲遇皇嫂之喪無有事嫂如事母之理人道有此乎非朕自尊矧兩

宮在上而昭聖皇太后有母道所壓為尤便再會官  
議擬歸一來說

此議擬歸一來說  
宮在上而昭聖皇太后有母道所壓為尤便再會官  
議擬歸一來說

覆議莊肅皇后請謚疏

該禮部題請大行莊肅皇后冊謚奉前旨云云臣等欽  
遵于本月廿一日復於東閣會集內閣諸臣仰遵聖諭  
再加詳議科道等官亦無異辭昨者禮部惟以莊肅皇  
后大行固上同於列后若論大分實上壓於兩宮若遽  
加以全禮委於皇上有倫理之嫌今日大行莊肅皇后  
謚議止宜且據謚法二字以表稱懿行俟他日再加徽  
號以備全典庶幾情禮兩得而事體相安矣但初議有  
四字八字之擬臣等俱未敢定論伏乞俯賜聖裁勅下  
翰林院撰擬謚文上請定奪候命下之日欽遵施行



嘉靖十四年二月廿二日具題廿四日奉旨你每既復議歸一既兩宮上壓皇嫂謚用六字曰孝靜莊惠安肅毅皇后數既用半且陰六又合着翰林院撰冊文禮部具儀擇日來看

莊肅皇后冊謚禮部具儀疏

祠祭清吏司案呈先該本部會同內閣府部等衙門會議大行莊肅皇后謚議具題節奉聖旨皇嫂謚曰孝靜莊惠安肅毅皇后着翰林院撰冊文禮部具儀擇日來看欽此欽遵行在欽天監選擇後開大吉日時前來案呈到部臣等謹欽遵明命將合行禮儀開具上請合候命下本部行移內外各該衙門遵奉施行所據充正副使官員伏乞欽命

計開

一擇日欽天監擇到嘉靖十四年三月初十日卯



時吉

一祭告前一日上具常服詣奉先殿行祭告禮用祝文香帛酒果脯醢如常儀遣內侍官祭告几筵陳設如常儀

一行冊寶禮前期鴻臚寺官設冊寶案于奉天門東內侍官設冊寶案于几筵前冊案居左寶案居右至期上服元袞御奉天門正副使常服百官青衣本等帶入班行叩頭禮畢百官左右侍班正副使就班立定序班舉冊寶案于正中置定正副使行五拜三叩頭禮畢序班舉案行正

副使後隨鴻臚寺官奏禮畢上還冊寶至右順門正副使朝北立侍官捧冊寶由正門入至几筵前以冊寶置于案內贊贊就位上香兩拜立贊宣冊宣冊官取冊立宣訖贊宣寶宣寶官取寶立宣訖復置于案贊奠爵奠酒贊禮畢內侍官由正門出至右順門外報正副使禮畢正副使得報次日早復命

一頒告次日勅本部膳黃差官頒示天下

嘉靖十四年三月初一日具題初二奉旨依擬

嘉靖十四年三月初二日... 門五關... 欽奉聖諭疏

欽奉聖諭疏

嘉靖十四年三月初二日上御文華殿西室伏蒙召見督工諸臣該大學士張孚敬等面奏廟工肇興八廟神主既暫奉安於內殿世廟神主亦宜暫奉安於崇先殿欽蒙聖諭允可命臣言擇日具闕欽此除欽遵行該欽天監擇到本年三月初八日辰時吉臣謹將一應合行禮儀開坐奏聞伏候聖裁

計開

- 一行翰林院撰祝文
- 一是日早太常寺備辦祭品香帛上恭詣世廟行

祭告禮如常儀

一錦衣衛備傘扇儀衛導從至奉天殿門前退

一司設監備神主金輿并冊寶亭衣冠亭各一座

於世廟門外候上捧主降座陞輿冊寶衣冠太

常官各捧至亭內上陞轎隨行至太廟左門上

降轎太常官跪奏請神主降輿上捧主出輿行

至太廟右門太常官跪奏請神主陞輿上捧主

奉安輿內進行上陞轎由端門午門奉天門中

左門後左門至奉先殿門外上降轎太常官跪

奏請神主降輿上捧主入門過陞左太常官跪

奏請神主陞輿至崇先殿上請神主降輿陞座

次日行安神禮

嘉靖十四年三月初四日具題初五日奉旨是禮部

知道

嘉靖十四年四月初一日孟夏時禘享太廟時享  
世廟今方修建宗廟世廟列聖暨皇考恭睿獻皇帝神  
主俱暫奉安於內殿則太廟時禘享之祭當於奉先殿  
世廟時禘享之祭當於崇先殿舉行但臣等思得奉先  
殿規制比於太廟狹小列聖神位若以太祖南向居中  
太宗以下俱左右列坐如常儀則難於安設其籩豆牲  
醴并衣冠几案俱各難容合無從權照依孟春特享禮  
儀奉入廟神座俱列南向俎豆以次前陳衣冠分設左  
右列樂舞於丹陛東西其親王神位照舊書寫紙牌功

祭祀疏

照得嘉靖十四年四月初一日孟夏時禘享太廟時享  
世廟今方修建宗廟世廟列聖暨皇考恭睿獻皇帝神  
主俱暫奉安於內殿則太廟時禘享之祭當於奉先殿  
世廟時禘享之祭當於崇先殿舉行但臣等思得奉先  
殿規制比於太廟狹小列聖神位若以太祖南向居中  
太宗以下俱左右列坐如常儀則難於安設其籩豆牲  
醴并衣冠几案俱各難容合無從權照依孟春特享禮  
儀奉入廟神座俱列南向俎豆以次前陳衣冠分設左  
右列樂舞於丹陛東西其親王神位照舊書寫紙牌功

臣亦合暫書紙牌序列於東西兩廊所有陪祀官員合  
欽遵聖諭比照帝社稷壇事例臨期行令太常寺查取  
文武大臣疏名奏請簡命奉先殿於奉先門外崇先殿  
於丹墀內各恭陪行禮但內殿一應陳設位置既與太  
廟不同其禮儀次序執事人員未經習熟合無於太常  
寺奏祭之日請命司禮監官會同臣等率領太常執事  
官員人等恭詣內殿預先從宜陳設演習庶至期得以  
敬恭將事可以仰承皇上孝享之誠矣

嘉靖十四年三月二十日具題廿一日奉旨依擬且  
都權宜行

奉勅考訂儀文曲禮疏

臣言本月十八於文華殿欽蒙召對同大學士李時議  
及宗廟祭祀伏奉聖諭祭以厥明行事爲敬其脫履入  
殿恐古人禮意與今不同宜考議來聞欽此臣仰思皇  
上孝享祖考匪徒廟建備制茲於儀文曲禮悉加考訂  
以致其誠敬甚盛心也謹按儀禮凡祭厥明行事晏朝  
乃闕故祭之日雞人夜嘑旦以噐百官闈人設門燎躡  
宮門廟門所以嚴有事也子路爲宰與祭厥明行事晏  
朝而退孔子曰誰謂由不知禮是厥明行事實所以致  
敬也故是四時之享秋孟以中夜三孟以日中蚤晏未

時誠宜厥明行事晏朝成禮可也古人席地而坐飲食用籩豆亦席地以設故待坐於長者履不上於堂入則脫履出則納履雖以致潔亦便拜跪然行於古人席地之時則可行之于今則非宜矣若今脫履上殿意者猶恐履聲嫌於不恪然履以飾足爲禮脫履雖若致敬而足不爲飾亦近於褻矣合候命下凡今後宗廟祭祀俱用厥明行事太常寺先時陳設神宮監先時洒掃所司設燎廟庭錦衣衛具儀衛如常其脫履一節合請上位凡遇廟祀行禮不用脫舄下至陪祀官及諸執事俱用潔淨新履不必脫去以爲常儀庶得合古宜今之道而

皇上孝享之誠敬足以格于祖考作範來裔矣

嘉靖十四年三月廿三日具題廿五日奉旨依擬燎罷

嘉靖十四年二月廿五日節該本部尙書夏言欽奉宸翰賜諭內殿禮儀四月八日俗事宜革去但有賜百官不落夾之例此當議改日行欽此復於三月二十日節奉聖諭禮記月令篇謂是月麥先熟以薦寢廟今可取此義歲以孟夏之五日薦內殿賜百官仍具米食造如舊名曰麥餅卿可與二輔擬來欽此臣言謹欽遵會同內閣大學士張孚敬李時議得四月八日例賜百官不落夾者相沿釋氏之說於禮無據誠如聖諭所宜革去及禮經考之月令篇是月麥先熟以薦寢廟蓋麥爲五

奉諭議孟夏薦麥及賜百官麥餅疏

嘉靖十四年二月廿五日節該本部尙書夏言欽奉宸翰賜諭內殿禮儀四月八日俗事宜革去但有賜百官不落夾之例此當議改日行欽此復於三月二十日節奉聖諭禮記月令篇謂是月麥先熟以薦寢廟今可取此義歲以孟夏之五日薦內殿賜百官仍具米食造如舊名曰麥餅卿可與二輔擬來欽此臣言謹欽遵會同內閣大學士張孚敬李時議得四月八日例賜百官不落夾者相沿釋氏之說於禮無據誠如聖諭所宜革去及禮經考之月令篇是月麥先熟以薦寢廟蓋麥爲五



穀之先詩云貽我來牟帝命率育此古人所以重麥以  
 薦新也聖諭歲以孟夏之五日薦內殿賜百官改名曰  
 麥餅仰見聖明據經析禮不因故襲俗得先王之遺意  
 而可垂法於後世矣合候命下著為常典每歲于四月  
 初五日薦新麥於內殿是日賜百官麥餅仍行內外各  
 該衙門欽遵先期題請供辦施行

嘉靖十四年三月廿三日具題廿五日奉旨是著著  
 為令

太常寺呈稱太廟世廟金鐘年久俱有綻裂合無一體  
 修造庶幾大禮既定大樂亦成足昭盛典於無窮矣  
 嘉靖十四年四月十一日具題十四日奉旨是

請定宗廟雅樂疏

祠祭清吏司案呈國之大事在祀祀以禮樂爲先宗廟之禮旣備宗廟之樂所當講也我朝宗廟雅樂升歌舞籥制云備矣但今廟旣特建則樂亦當特設至於升歌之頌又以形容功德告於神明若特享祫享大祫宜各有頌以格祖考庶幾禮樂明備等因案呈到部臣等竊惟治定制禮功成作樂其功大者其樂備其治辨者其禮具然樂之爲道事與功偕考之樂書所論詩頌所述季札所稱其來尚矣我朝宗廟雅樂升歌舞籥聲容盛美惟是原爲同堂之制統在太廟今各廟旣已特建則

樂亦誠宜特設若夫原日樂章乃國初所作其所稱揚止及德懿熙仁四祖如云慶源發祥世德惟崇是已今四祖久祧舊章弗協我太祖創業太宗定鼎列聖守成神功聖德與天無極當有頌聲以對越在天是誠有待于今日者也皇上以神聖之資建中和之極操三重制作之權適百年禮樂之會仰知久注淵衷行當裁定所據各廟特享太廟祫享大祫一應樂章合候命下行移翰林院預先撰述取自上裁及有一應樂器樂舞等項本部移咨工部轉行內外經該衙門會同太常寺官遵照太廟原定式樣逐一如法成造徑自題請施行及照

興隆寺火災乞順天意永絕異端疏

祠祭清吏司案呈奉本部送禮科抄出河南道監察御史諸演題竊惟大君者天之宗子精神意氣相爲感通君之所爲以天之心爲心天必默相以順成其美以決其意向所趨之正故甘露降黃河清雨暘燠寒風時若年歲豐稔皆陛下聖德隆盛禮教休明之徵應也即今年興隆寺火災之故臣又有以驗陛下之排斥佛教深契乎天心天固默相乎陛下將以順承乎此志然耳夫佛本夷狄之教非聖人之法自漢以上未之有也明帝之時始入中國嗣是以來漸崇信之乃聽其宏殿峻

宇雕梁畫棟圖形塑像繪彩泥金羣聚天下淪沒三綱  
之人而豢養之惑世誣民耗財蠹政莫此爲甚唐臣韓  
愈佛骨一表關之甚詳凡少知義理者無不知其爲非  
然流傳既久因循成俗卒未有能盡除之者此豈天之  
心哉恭惟皇上慨百世之沉迷洗千古之陋習乃命京  
師內外毀寺宇汰僧尼申勅天下臣工勸諭僧人還俗  
將以漸除之以挽回天下於三代之隆此何心哉天之  
心也陛下以天之心爲心天之所以感契乎陛下者諒  
無不至矣臣故於今大興隆寺之火有以驗其然也蓋  
陛下前日之獨存此寺者非謂其有益於治而存之也

蓋曰姑存之漸以圖之耳則盡其教而除之者陛下之  
意也夫先師孔子之像陛下謂非禮之所宜亟詔去之  
天下始而駭終而翕然信而安之以爲陛下見高千古  
意出百王真足以垂訓萬世也則盡去佛像以息異端  
以崇正道臣知陛下之有是心也久且切矣今者之火  
并其佛像所居之殿宇而煨燼之天於佛像示可毀也  
蓋默契陛下之心而順成之云爾夫此寺者天下之寺  
之宗示毀於此則天下之寺之佛之像之當毀也可知  
也臣聞天下之事得其機則易於爲力欲息天下之佛  
教必當先毀天下之佛像蓋毀佛像者王化之機也伏

望陛下仰承上天順成之意俯察王化易行之機降勅禮部申明禁約頒布天下凡各寺院一切佛像悉令毀之投諸水火永絕根源則僧人不必逐也失其所依彼將自散迨數十餘年天下將不識其所謂佛者矣使天下後世曉然知大聖人之所作爲有出於尋常萬萬者又不在此舉耶世之惑於其說者謂佛有靈弗可毀也其果靈耶何不自庇其身而一朝煨燼之如此此其說之不足信也明矣如其有靈能爲禍患臣請以身當之臣又觀夫大興隆寺之基地甚開廣仍乞勅禮部從長集議或將此寺改爲習儀祝聖之處庶近且便於禮似

亦相宜臣無任戰慄之至等因奉旨禮部看了來說欽此欽遵抄出送司案呈到部看得御史諸演因大興隆寺災建言將天下寺院佛像悉令毀除永絕根源一節具見本官因事納言崇正闢邪之意臣等竊惟佛之爲教古無有也自漢明帝時始入中國而其教遂漫衍于世實繁有徒久卒難去世之賢主碩儒未嘗不欲去之已嘗去矣而復大集是故唐韓愈佛骨一表闢之甚力及作原道亦曰明先王之道以道之使鰥寡孤獨廢疾者有養而後庶幾其可宋之歐陽修作本論又謂不必火其書廬其居惟修其本則其教自息彼固有見夫天

下之事有難以力驅之而拔本塞源固自有道也且古  
之爲佛者其言近理真足以惑世誣民今之爲佛者不  
過窮民無養逃於佛以爲衣食計耳况我朝令典私剝  
菴院有禁私度僧尼有禁且有田有租有身有役不拜  
父母有罪使知君臣父子之義無所逃於天地之間並  
生並育其爲慮甚深爲道甚大也迨我皇上以聖人在  
天子之位御極以來未嘗度一僧且頒行詔旨諭令還  
俗四方從化者亦以萬計此正明吾道以道之修其本  
以勝之之意也今本官建言佛像可毀則佛法可滅且  
引去孔子塑像爲喻然莊嚴像設本起自釋氏而吾儒

襲之則非矣故去孔子塑像所以尊孔子也今去佛像  
而存僧與寺似未足以永絕根源恐徒以毀撤之繁重  
擾民力無益也合無候命下之日本部申明禁例仍通  
行天下除不許私剝外今後所在寺院宮殿任其頽壞  
不許修葺民間童幼不許捨入爲僧私自披剃及奏請  
開度違者重治以罪守之不變將覓數十年後室壞而  
像不能獨存人亡而其迹自息無事毀滅之勞坐致祛  
除之効去佛之功於是爲大天下後世必有以仰見大  
聖人所爲有高出千古之上者矣其欲將大興隆寺基  
改爲習儀處所亦爲有見但今宗廟大工方殷未免重

煩營建埃閒暇之日具奏舉行惟復別有定奪伏乞聖裁

嘉靖十四年四月十二日具題十四日奉旨這寺既毀永不許復習儀亦照舊此故地豈可用併大慈恩寺一應修齋盡行革了僧錄司併此徒你部裏再議了來說欽此

議處興隆寺僧衆疏

節該河南道監察御史諸演題前事等因奉旨禮部看了來說欽此欽遵案呈到部臣等竊惟云云等因奉前旨云云臣等議得近者大興隆寺之燬我皇上俯采言官所論本部所請既不許復建寺場且革去各寺修齋俗事仰知聖見超出千古其僧錄司并徒衆委應議處是又曲盡事情蓋僧依于寺官以領僧今寺既燬則僧錄司并徒衆誠不當仍依故地據審得大隆善寺方丈堪改僧錄司衙門其僧徒繁衆非一寺能容必須聽其徒便散處於京城內外寺院合併居住合無伏候命下

將僧錄司改於大隆善寺方丈官吏隨住其原寺僧徒聽其告就各寺依住中間有願歸正從化者聽其具告還俗再照功臣姚廣孝牌位近年附享本寺今亦當改遷合無一併移於大隆善寺內安設其祀典照常舉行嘉靖十四年四月十八日具題二十日奉旨依擬有歸化的還議恤典來看

議興隆寺僧衆及田地器物疏

節該前因又奉聖旨云云該本部委官署員外郎事主事張鏊呈查盤過本寺在庫錢糧銅鐵器物兩廊官房地基莊田數目開報前來案呈到部看得大興隆寺既燬所有僧徒該本部議覆荷蒙聖恩俯從其歸化者復令臣議加恤典仰見聖慈天地之仁不使一物不得其所甚盛心也合候命下本部行移僧錄司曉諭僧衆但有願歸正從化者許令本僧赴部投告查審明白給帖執照回籍本戶隨住免其一應差徭十年仍將本寺查過寄庫銀兩每名給銀五兩以爲養贍之資用昭皇上



優恤之典及再照本寺在庫銀兩器物并兩廊官房莊田等項俱經委官查盤明白相應議處合無將金銀等件俱發順天府寄庫收貯以備別項公用內玉帶并金廂寶帶寶刀寶鈔水晶珍珠寶石原係欽賜之物乞勅內府衙門收進其銅鐵器物之類照數入官但莊田亦係先年欽賜隨寺地土每歲所收子粒給散本寺僧衆用度合無仍令各僧照舊佃種惟復其房屋地基盡行入官均乞聖裁候命下之日移文該部收管施行

嘉靖十四年四月廿二日具題廿四日奉旨莊田暫

着戶部管

各寺之徒有歸正的係無籍者查奏各量給他畝數差徭免准六年其餘依擬欽此

議處王子嫡庶爭襲疏


儀制清吏司案呈奉本部送節於內府抄出藩王亂移奏為奸佞外親教唆繼室幽囚生母陷害孤兒蒙蔽倖請妃號倒置倫理以幼奪長冒襲郡王十分極苦不得伸冤懇乞天恩辯明倫序正綱常以彰國法事云云等因奉旨禮部看了來說欽此又該藩府吳江昭和玉繼妃劉氏奏為奸惡不孝聽信豪親朋謀撥置罔遵祖訓觸害嫡母欺凌嫡弟乘機冒爭王爵大壞紀綱擗引不相奏比事例朦朧陷害情極冤枉懇乞天恩分明嫡庶以申母氏屈抑等事云云等因奉旨禮部知道欽此又

該吳江王勛清奏爲陳情乞恩辯明姦詐庶兄背逆嫡母恩念罔遵祖訓捧引無干事例謀奪王爵變亂成憲朦啓親王見受屈枉等事云云等因奉旨禮部知道欽此欽遵通抄送司今該前因通查案呈到部看得潘王奏稱吳江昭和王子鎮國將軍勛浩有父詮鏗存日嫡母妃秦氏於弘治十七年十二月初六日病故父於弘治十八年娶浩生母李氏爲妾媵正德元年十一月二十二日生浩本年九月內奏選劉氏爲內助正德七年十二月二十四日浩父病故正德八年八月十八日劉氏方生浩弟勛清正德十年間劉氏朦朧奏請封爲繼

妃嘉靖六年十月內將弟勛清朦朧奏請冒襲父爵比與魯府鄒平王陽鏞事體相同乞要差官查勘將劉氏削去繼妃之號勛浩賜以郡爵之封就勛清等冊服追廻別候遣官行禮及該吳江昭和王繼妃劉氏并吳江王勛清各奏稱庶子勛浩聽人撥置設意陰害嫡母侵謀王爵乞要吊查玉牒冊參詳辯白及要移咨在京三法司公正官員親詣藩鎮從公問究各一節爲照弘治十八年間該潘王奏稱吳江王詮鏗妃秦氏病故並無子女乞要選娶繼室本部行准宗人府等衙門查報相同題在聽令再選及選有劉氏該山西布政司勘報無

木沙考言  
忠補書院  
碍具結前來隨該本部題在將劉氏封爲吳江王繼妃  
去後於正德十年奏乞關領鍍金銀冊等因該本部查  
得該府造到玉牒冊內詮鏗位下宮人李氏已於正德  
元年十一月二十二日庶生第三子勛祐既有庶出之  
子似爲有後所據劉氏先年則不當請封繼妃矣該府  
自合從實開奏止爲內助却乃朦朧請封繼妃以致伊  
父亦得請封兵馬於例俱屬有違况係妃號重事本部  
難便定擬合無將鍍金銀冊等件暫且停止仍行鎮巡  
等官查勘明白具奏等因題奉武宗皇帝聖旨再議處  
停當來說欽此隨該本部再議得宗室正妃夫人病故

之後已有子者不許奏請繼室係是見行事例若奏請  
繼選之後已有庶生之子而復將被選之人請封繼妃  
揆以前例恐非所宜况日後襲封往往爭辯於嫡庶之  
間而繼妃之合例與否不得不致嚴於其始故本部於  
吳江王繼妃奏請冊封查得請封之前已有庶生一子  
未曾開奏欲行查勘定奪今奉欽依着令再議蓋以吳  
江王奏請再選之時原無庶子朝廷既已許之况今年  
久封號已定欲慎重而詳審以無失親親之誼也緣吳  
江王初奏再選之時於例委亦相應請封之日似乎涉  
於遷就但文移往復動輒經年奏選於生子之前請封



於准選之後跡雖欠明情亦無他合無遵照先年成命將冊命冠服等件照例給與惟復仍候查勘至日施行等因覆題奉武宗皇帝聖旨是劉氏冊命冠服等件准照例給與欽此又查得宮人李氏所生子勛沽於正德十五年四月內該潘王詮鉦具奏封爲鎮國將軍後於嘉靖五年四月內又該潘王詮鉦奏稱吳江昭和王詮鏗繼妃劉氏所生嫡弟五子勛清乞要襲封父爵該本部備查前項已有庶子勛沽在前而奏選劉氏請封繼妃在後議擬具題奉欽依將劉氏所生子勛清襲封吳江王去後今該潘王及劉氏勛清各具奏前因照得吳

江王詮鏗奏選繼室之時原無庶子於例委亦相應及選有劉氏而宮人李氏方生有庶子勛沽彼時該府自宜將續生勛沽明白奏報劉氏止應立爲內助不當朦朧請封繼妃旣劉氏奉命封爲繼妃而其所生子勛清卽爲嫡出理宜承襲王爵旣勛清以嫡出襲封則其朦朧遷就不在于奏選承襲之時而在于旣選請封之日造端托始錯在當時今潘王爲勛沽辯奏援比魯府鄒平王陽鏞選娶丁氏事體不同盖鄒平王妃故之時明開生有庶子准選丁氏爲內助不會授封繼妃後因該府朦朧回結致將丁氏所生子當涼封嫡子當涼旣得

冒封長子後方請封丁氏爲繼妃其與劉氏得在選繼妃而後來朦朧遷就請封者有間况經本部先後覆請節奉有成命况今年久係干王爵重事難以輕議更改所據藩王奏要差官查勘事涉紛爭臣等擅難定擬均乞聖明裁奪

嘉靖十四年四月廿五日具題廿七日奉旨是這事情既與魯府事體不同且屢有成命已經年久不必差官查勘欽此

請增添協律贊禮司樂等官疏

祠祭清吏司案呈查得先該本部題各廟既已特建則樂亦誠宜特設已經奉有欽依將一應樂器樂舞樂章行移各該衙門欽遵外所據供事官員并樂舞生等項亦合照例添設呈乞議處施行案呈到部臣等仰惟皇上特建宗廟之制其一切禮儀所宜大備除禮樂器數已經題請外所有執事官員人等見在數少他日各廟供事不敷委宜增設今遵照太廟原設供事官并樂舞生名數總查七廟除見在官員樂舞生堪以通融供用外應該添協律郎贊禮郎司樂等官共四十員樂舞生

共一千二百二十九名合候命下本部行令太常寺將先年考選過聽補協律贊禮通贊掌樂等項并食糧年深樂舞生通行開送本部臣言欽遵日前面奉聖諭不拘資次通行嚴加考選以憑題請定奪其樂舞生數有不足通將該觀已未給度道童內揀選以充其未給度者選中照數填給度牒選完盡發該寺備造文冊送部以憑稽考所據各該樂舞生袍服等項亦合移咨工部轉行各該衙門照數如式成造施行所有各廟該用添設官員樂舞生數目開坐

計開

太宗廟一陳設冠服等件司樂一員一舉麾協律郎一員一司香司樂一員一讀祝贊禮郎一員一贊禮贊禮郎一員一對引贊禮郎一員昭穆六廟每廟官員同太宗廟一樂生七十二人一文舞生六十六人一武舞生六十六人一燒香六人一執事七人昭穆六廟每廟樂舞生同嘉靖十四年五月初一日具題初三日奉旨是



看欽此臣伏思前者一時考擬廟額若文祖世室之稱猶爲未盡蓋文祖嫌于太祖世室嫌于世廟今年正月二十一日臣言暨二輔臣伏蒙文華殿召對從容講論仰奉聖諭更定爲太宗廟蓋祖功宗德皆百世不遷即殷人祖契宗湯周人祖稷宗文武之義我太祖百世所祖我太宗百世所宗稱名取義深合宗法聖見超卓垂法萬世不可易矣昨蒙俞旨實臣前所題請後經欽定太宗廟名未奉明旨合再候命下一體欽遵行工所製造至于昭穆遞遷臣請終其義焉夫有天下者事七世三昭三穆與太祖之廟而七也祭義生于喪服喪服生

于人情五世親盡則情盡情盡則服盡服盡則祭從而盡帝系德厚非禮可制故七世之廟所以觀德示有終也是故世次旣盈新主當祔于是有祧焉功德之主所當宗也于是有不遷之廟焉世有定次宗無定數以其有功德之主當祧而不可祧者則宗之故不可以數定也在周有若文武在殷有若三宗周公所舉以勸成王者是也然遞遷之序先儒以昭常爲昭穆常爲穆假如新主世當祔昭則上世第一昭廟當祧世當祔穆則上世第一穆廟當祧各以其次遞遷昭主當祔則羣昭移而穆不移穆主當祔則羣穆移而昭不移此昭穆遞遷



之義也自三代以來未之有改也若夫百世共宗之義  
 其在我朝有同于隆古者今日特建太宗廟于左昭之  
 上是也其虛右穆之上者將以待有功德之宗當祧而  
 不可祧者是宗無定數之義也昔者周公作無逸舉三  
 宗文武以勸成王其意遠矣而成王實為有周令主百  
 世宗之臣雖不敏與議宗廟竊有耐於周公之義惟聖  
 明特賜裁定臣愚不勝願望之至

嘉靖十四年五月廿九日題六月初二日奉旨是皇  
 祖文皇帝廟曰太宗廟昭穆遞遷之意朕正為此要  
 此必昭不動穆穆不及昭方是正義可着著為令甲欽

桂洲奏議卷第十七

天祿中

